

BIMFWÀNYÌ BYÀ KILISTÒ



Aci ncyà kalolo kààbûngì be, bwa pawămbì nanku awu apu.

Ndi ne disanka dinene bwa kusanganyiiibwa mu nzubu wa Mukalenge. Kudi mwaba udi mutambe bwîmpè anu umwepele, ngwa mwikàle pamwe ne Mukalenge. Kì mmwômò anyi? Pùikalà . . . Maalu makole ônsò ne mateeta ne ntatu ya panwapa nebiikalè bikaadi bibwelakanangane mu maalaba munene, wa butumbi awu. Ne ncyà bushuwa ne tudi bindile cikondo citwaMumona Yêyè aci.

² Kadi muntu kampanda uvwa unkonka, dîngà dituku, wamba ne: “Udi welaku peebe meeji, Mwaneetu Branham, ne Dilwa dya Mukalenge dikaadi pabwîpì anyi?”

Mêmè kwamba ne: “Ndi ngiitabuujà cya bushuwa nanku.”

Yêyè ne: “Ee, mêmè’s nkaadi muumvwe bacyambamba kukaadi ntanta mule.”

³ “Kadi,” mûngààkambà, “dîngà dituku wadyakuumvwa bacyamba bwa musangu wa ndekeelu.” Nwamonu anyi? Ncyà bushuwa, bwalu Yêyè—Yêyè neafike dîngà dituku. Nenku nansha ciikàle dîbà kaayi, cîndì mêmè muswe nkwikala mudilongolole. Ndi . . . aci’s . . .

⁴ Tuvwa twakula, dituku adi, kumpala kwa beena kantu-ku-byanza kampanda, bàvwà bandumbùlùlà, ne bikwabo. Nenku—nenku bôbò kwamba . . . Umwe kwambaye ne: “Kiipacila keebe—keebe wêwè kaa musinga mutambe panwapa nkiipacila kaayi?”

Mêmè ne: “Ndi naaku kamwepele.”

Yêyè ne: “Nkèpì aku?”

⁵ Mêmè ne: “Kusungila misuuka bwa Kilisto.” Ki cintu—cintu cimwepele cîndì mêmè . . .

⁶ Kalumbilà kaanyi kaa katambe kutumbuka, ne kalumbilà kamwepele, nkaa kumona Yesu Kilisto mutumbishiibwe. Ndi ne mwoyi mbwa cyôci aci.

⁷ Nenku ndi ne disanka dyàbûngì, bujaadiki bwetu, bwa bidimu makumi asatu ne cimwe bikaadi bikùmbanà mpindyewu ebi, mbwa ne ndi muMukwacile mudimu ne kudipwekesha kwônsò. Bu ne mvwaku mwa kushaala ne mwoyi munda mwa bidimu mùliyô mujima, bu ne mvwaku mwa kushaala ne mwoyi ntanta yônsò awu, mvwa mufwanyine kujinga kwikala ne mwoyi kasunsa ne kasunsa kônsò Bwende Yêyè. Bwalu mêmè . . . Bu ne mvwa mumanye ne nêmbengiiibwè kundeelelu, s’ndyêsè dya dikema bwa kwikala ne mwoyi Bwende Yêyè! Yêyè mmulelela anu wa menemene ne mwîmpè wa dikema ewu!

⁸ Ne mêmè ncìtu mwanji kupetaku cintu nansha cimwe, mu ngendu yanyi yónsò ya panwapa, cifwanyine kufwanyikijibwa ne bwobumwe butudi naabu pamwe patudi paa nkaayetu abu to, Yèyè ne mêmè. Kakùtukù bwobumwe budi butambe kwikala bwa kalolo to. Mbunene bupite dinanga dya nî ncinyi nî ncinyi, dya mukaji, dya bânà, anyi dya nî ncinyi nî ncinyi, ki dinanga dya Kilisto. Ndilenga dya kacya.

⁹ Mpindyewu, tudi ne disanka dyàbùngì dya kumona ditabuluja edi kacya anu dyatungunuka munda mwa lumingu lujima. Ne mvwa muumvwe bamba ne Mwaneetu Parnell, ne bakwabo, mbenze miyiiki minene kaaba aka. Nenku tudi batwishiibwe ne mu ditabuluja edi . . .

¹⁰ Ditabuluja batu badyumvwa bibi misangu mikwabo. Muntu kampana udi udelela meeji ne ditabuluja nkubweja kwa bidimba bipyabipya mu ekeleeziya. To. Bipeta bya ditabuluja ki byòbì abi. Kadi ditabuluja mbwa kufuululula cìkaadi kwònsò eku mu ekeleeziya aci. Nwamonu anyi? Mbwa—mbwa kutwala cyòcì aci.

¹¹ Kuvwa musangu kampana wúmvwà mwimane kupenga kwa mbû, ne ndi—ndi ngeela meeji ne nkaadi muciteeleteele misangu yàbùngì, kadi cidi. . . kukaavwa ntanta mule, bidimu. Ne civwa musangu wanyi paanyi wa kumpala wa kumona, ee, kacivwa mbû to. Civwa n’Dijiba dya Michigan. Hope ne mêmè tuvwa baye kuntwaku musangu ùvwà Cisangilu cya muyiiki cya Buloba bujima cyenzekeleku. Civwa mmu, ngeela meeji, bu mu cidimu cya 1922 nanku, Mwaneetu Egan, bwa mêmè muvuluke bîmpè menemene, mmusangu ùvwà Cisangilu cya muyiiki cya Buloba bujima cyenzekele mu—mu Chicago. Ùvwa mmusangu wanyi wa kumpala wa kumonaku mushiki wa mâyi maalabale mushindu wawa. Nenku mvwa mwimanyine mwaba awu diine dituku adi, mêmè kumona mavwala manene awu. Civwa anu. . . Mu dinda dya Paasaka, bavwa benza disangisha dya dipatuka dya dîbà kuntwaku. Kadi pa kumona mavwala manene awu abwela apatuka, ne, kaa, bivwa byenze anu bu ne avwa ne disanka diyiila ne panshi.

¹² Kadi mêmè kubanga kudyambidila ne: “Udi mumanye’s, kamwena mâyi makwabo masakidila mu dijiba mwamwa, padidi dyenza mushindu wawa pààpa, kupita patuwu matalale menemene to. Bùdi anu mmbùngì bumwebumwe bwa mâyi abu, kakuyi dimata nansha dimwe disakidilamu to.” Kadi mêmè kudyambidila ne: “Ee, mbwa cinyi bùdi mpeepele—mpeepele yipweka ne—ne yinyungisha dijiba yidibândisha muulu mushindu wawa?” Mbwa kuumusha bucyafu bwònsò mu dijiba amu. Nwamonu anyi? Yidi yimansha bintu byònsò ku mwelelu. Pàdì. . .

¹³ Ki dîbà adi mêmè kudyambidila ne: “Cyacya’s ncyenze anu bu ne dijiba didi dyenza ditabuluja’s.” Nwamonu anyi?

Mpeepele yìdì yidinyungisha, ne yiditupisha muulu, ne yidikoka eku ne eku, mu mushindu wa bisote byònsò bipatuka. Ki mushindu awu menemene ùdì ditabuluja, mbwa kutufikisha ku dibwela mu Nyuma wa Mukalenge, ne kucyonkomoka, ne kulongolola bilema, ne kwikala ne lwendu lwa lutambe kwikala lwa sheemàsheemà, ne didilambula dya cyakabidi, ne didilambula, too ne pàdì bintu byònsò ne mpatà ya pa buloba byediibwe byònsò pambelu ku mwelelu, nudi numona's. Dìbà adi cidi mwenji mwìmpè, mutooke, upweka kubangila apu, pàkaadi mazuwa a kale a mwoyi wa panwapa awu abanga kupicilamu biteketebitekete. Kaa, kabyenaku bikukengela byàbùngì menemene bya kutabaleela to, bwalu bintu byònsò mbimane kuumushiibwa mu njila. Abi's mbìmpè.

¹⁴ Ee, diloolo edi, katwena baswe kunulama ntanta mupitepite bule to, bu mudibi ne eci ndiloolo dya mu dimwe, ne diloolo dya kumpala dya lumingu, bwa diloolo dyetu dya ditabuluja. Nenku mvwa ne disanka dyàbùngì bwa kumanyisha ne ditabuluja nditungunuke.

¹⁵ Nenku ndi ne balunda bààbùngì. Nyewu mmona bàna beetu kampanda mwab'ewu, ne bantu batu bampeeshe biloota bivwabo baloote, mu mbingu mikese mishaale eyi. Nenku Mukalenge mmunkwacishe bwa kupeta dyumvwija dya biine bintu abi mpindyewu. Ncyèna mumanye ne badi munkaci mwetu mbanganyi to, ne beenyi badi bùngì kaayi to, anyi bikwabo byònsò. Kadi Mukalenge Nzambi ucitu anu ufila dyumvwija dya biloota. Mbya bushuwa ne bipwangane.

¹⁶ Ne Yèyè udi anu Nzambi umwèumwè uvwa mu matuku a Yozefu awu, paa—paakaloota mfumu biloota apu. Nenku yèyè kuumumvwijabi, ne dyumvwija adi divwa mu dyòdì. Ne bimwe bya ku biloota abi bicidi bishaale mene too leelu ewu. Bipeta byabi bicidi anu bitungunuke. Kabidi, Danyelee, mu matuku a Nebukandeneesa.

¹⁷ Nenku mpaasata wetu mukese wa butumbi, mudipwekeshe ewu, wàm̀bì, kukaadi katanci, ee, ne yèyè—yèyè kavwaku muswe kundomba bwa kumukwacisha kabidi to mu lumingu elu. Úvwa wamba ne: “Ndi mumanye ne wèwè udi mucyoke, Mwaneetu Branham. Kadi,” yèyè ne, “ee,” yèyè ne, “tudi anu bindile ne biikàle tudikonka.” Abi's mbilenga.

¹⁸ Byòbì biine, byakankengela bwa kulekelela disangisha dya mu Sydney, mu Australie, bwalu kabavwa baswe kumpeesha dyanyisha dya kuyaku musangu ewu to, nwamonu's, bwa kuumuka mu États-Unis pa dìbà edi. Ne, pa nanku, ne bikwabo bintu, pa nanku ncyèna mwa kukuya pa dìbà edi mene to. Ncyèna mumanye ne nêmpetè mushindu wa kukuya cikondo kaayi to. Kadi abidi adi panshi aa nêmpetè mushindu. Kadi pavwabi bitukengela bwa kucipingaja paanyima ndambu, nkaadi nya ku Chicagò mpindyewu ewu, ku—ku disangisha dya

mu Chicago, dilwalwà edi. Bwalu, bakaavwa bamanyishe ne mêmè nêngiikalèku, kadi paanyi nciyi mumanye to. Cíkondo cîmvwà ne cya kwikalaku, bivwa bikengela bwa mêmè kwikala mu Bisanga bya Fidji, muvwabo bambe ne nemusangile bantu bààbúngì, mwômò amu paamu, mu bisanga amu. Kadi mêmè ncyakupeta mushindu wa kwenza disangisha adi mpindyewu ewu to, kuntwaku, bwa dyanyisha dya kuyaku. Nenku, kadi, nênkùye, abidi adi panshi aa. Bôbò badi anu bindile.

¹⁹ Mpindyewu nêngiikalè ku Chicago. Gene, udi mumanye matuku a ngondo yikaladi anyi? Kudiku muntu mumanye civwabo bamanyishe bwa matuku a disangisha anyi? Ncyèna nansha mumanye ne divwa mene díbà kaayi to. Ndi paanyi mucimone anu mu cikandakanda cya *Mukòbodi Wa Diitabuuja* cyanaana. Ngeela meeji ne nebibange lwà ku matuku a ngondo 4 anyi 5, anyi cintu bu nanku awu. Anyi, nkumpala eku, bu mu lumingu lumwe kuumukila ku mpindyewu, anyi mu matuku dikumi. Nenku ndi mushaale mu dilubakana dyàbúngì be, nenku ndi dijinga ne masambila enu.

²⁰ Mpindyewu, bwa diloolo edi, ndi musungule ndambu wa Mifundu ya dibala, panwikala baswe bwa kubala pamwe naanyi, mu Yone Munsantu nshapita wa 13, katupa kakese cyanaana. Nwênù badi balame Bibles yenu pabwipi, ne baswe bwa kwikala kwenda kulonda dibala, patudi twenda tubala apa.

²¹ Nenku dyakamwe paanyima paa disangisha edi, diloolo edi, nekwenzeke didiibidija dya kutwa kwa lwendu lwa babàka kaaba aka. Pa nanku, padibo anu batutangalaja, bu twètù mwa kulwijakajaku ne lukasa lwònsò, ne mwetu mwònsò. Kí nkulwijaka to; kadi padi anu mu citanda emu mushaala mutupu, díbà adi mbaswe bwa kudiibidija bwa kutwa kwa lwendu lwa babàka. Nenku nekwiikalè dibaka kaaba aka, maalaba diloolo. Babidi baa ku bânà beetu balela baa mu bwobumwe bwa tabernacle ewu nebiikalè ne cya kuswikiibwa mu dibaka maalaba diloolo, bu munudi bònsò bamanye. Mwaneetu wa balume wa musangeelu, David Wood awu udi ubwela mu dibaka, ubwela mu dibaka ne Marilyn Jefferies, maalaba diloolo, ku tabernacle, kumpala menemene kwa disangisha kubangadi. Ne pa nanku edi dibaka dyòdi ndya badiibidija bwa kutwa kwa lwendu lwa babàka. Anu . . . Kadyakwikala dya mikùùkùku menemene to; nediikalè dibaka dya mikùùkùku ndambu maalaba diloolo.

Mpindyewu, kumpala kwa twètù kubala Dîyì Dyende, tusambilaayi.

²² Taatù Nzambi, patudi tulwa ne kaneemu kaa katambe búngì mu Bwikadi Bwebe apa, bambule kumpala kwetu Dîná dya Yesu didi dikumbane mu byònsò adi, tudì batwishiibwe ne Wèwè neútùmvwilè. Bwalu, Yèyè mmwambe ne: “Nulombe Taatù cintu kana cyònsò mu Dîná Dyanyi, Mêmè nêncyènzè.” Ki bwa cinyi,

tudi tulwa, twètù bu beena kwitabuuja beena Kilisto, ne dikima dyònsò ku Nkwasa wa ngàsà, bamanye nenku, ne, piikalà myoyi yetu kayiyi yitupiisha to, tudi bamanye dîbà adi ne dilomba dyetu nedyandamunyiibwe kudi Nzambi.

²³ Nenku tudi tulomba bwa nsòmbelu yetu yiKusankisheku bikole, ku ditonda dya bilema byetu, ne dya bwakane Bwende bwa kutufwila kwa luse, bwa ne majinga etu neakumbajiibwe diloolo edi. Nenku, Mukalenge, dijinga dyetu dya ditambe bunene ndya kumona ngàsà Webe munene awu wicikijiibwa pambidi peetu, ne udi—udi, ùtùfwilèku luse ku mpekaatu yetu ne bwa kwondopa mabeedi adi munkaci mwetu. Nenku Wèwè udi mufwanyine kwakula neetu mu mushindu wa dibuulula, anyi wa ciprofeta, anyi nî ncinyi cyònsò cyùdì Wèwè mufwanyine kujinga kwambila Ekeleeziya Webe aci. Swaku bwa myoyi yetu yiikalè mpanza ya Nyuma Webe. Swaku bwa twètù kwikala batambe kutwangana ne nshinga munene wa nzembu diloolo edi, bwa Nyuma Mwimpè wamonaku mwa kwakula ne myoyi yetu, ne kupetela butumbi ku Bwikadi Bwende.

²⁴ Mpindyewu, Mukalenge, tudi baswe kulombela aba bònsò bàdì babeedi ne bàdì mu lukengelu lwa bintu. Bwalu, kumpala menemene kwa kulwa, pàvwà kaleleki wetu mutwale ku bìrò byanyi, mu matuku abi mashaale aa, anu milongolongo mile ya mènà, a baa mu ditunga dijima, bàdì bàsaamà, bàpùnga ne lufu, njiwu ya cimpicimpi mifunda ne màyi makunze. Nenku pàndì ntwa munu wanyi pa dyònsò dya kudiwu apa, ngenda mpweka ne dibèji, Éyi Nzambi, kumpala kwa ekeleeziya ewu, diloolo edi, ndi ndomba ngàsà Webe ne luse, bwa muntu ne muntu. Wèwè ngudi mumanye muntu ne muntu wa kudibo, ne cidibo naaci dijinga.

²⁵ Ne katwena baswe kupwa mwoyi, Mukalenge, aba bàkaadi bènda bàkànkamana to, diloolo edi, aba bàdì mwamwa mu nzubu ya bakulakaji ne balema. Éyi Mukalenge Nzambi, bààbùngì baa kudibo mbànà Beebe basukula ku Mashi. Kaa, patudi twenda tukulakaja, ne bananga beetu bamane kutupwa mwoyi, kudi busambi bumwepele butudi naabu: Nzambi katu upwaku mwoyi to. Byenzedi byetu byònsò mbifundiibwe mu Mukanda wa Mwoyi, ne bidi bisanganyiibwa kashidi mu Bwikadi Bwende. Nenku tudi basweku bwa kulomba bwabo bôbò, diloolo edi, Mukalenge.

²⁶ Tudi tulomba luse bwa ditunga dyetu. Ne bwa aba bàdì benza mpekaatu ne bàdì benza bilema, ne bwa aba bàdì mu binwinu bya maala ne—ne mu ngiikadilu mishiileshiiilangane ya mpekaatu, diloolo edi, tudi baswe kulomba ngàsà udi ufwa luse, Mukalenge. Ne tudi tulomba bwa Wèwè kututwaku mpàndà, Mukalenge, bwa myoyi yetu yamonaku mwa kwikala myùle tente ne dinanga Dyebe, bwa ciikalè dijinga dyetu dya ditambe bunene dya kuKusadila ne kubamona bôbò abu basungidiibwe.

27 Beneshaku kubala kwa Dìyì, ne byònsò bitudi twenza. Ne kudipwekesha kwònsò netwinyike mitu yetu ne netuKusakidile, bwalu tudi tulomba nunku mu Dîna dya Yesu. Amen.

28 Mpindyewu buululaayi mu Mukanda wa Yone Munsantu, ku nshapita wa 13, netubale katupa.

Mpindyewu kumpala kwa difesto dya paasaka, pàakamanyà Yesu ne dîbà dyende dyakalwa divwaye ne cya kuumuka pa buloba ebu ne kuya ku Taatù, yéyè mumane kunanga bende yéyè bàvwà pa buloba abu, wakabananga too ne ku ndekeelu.

Neuku pàakajikà didya dya diloolo, dyabulu mumane mpindyewu kuteeka munda mwa mwoyi wa Yudaasa Mpongoloki, mwànà wa Simona, bwa kumutungila,

Yesu mumanye ne Taatù uvwa mumupe bintu byònsò mu byanza byende, ne yéyè uvwa mufume ku Nzambi, ne uvwa uya ku Nzambi,

Yéyè kujuuka ku didya dya diloolo adi, ne wakateeka ku luseke bivwalu byende, ne wakangata ditwaya, ne wakadijingiladi mu cifuka.

Paanyima paa aci yéyè e kupongolola mâyi mu dilòngò, ne wakabanga kwowesha bayidi ku makàsà, ne kuàkùpula ne ditwaya divwaye mudijingile mu cifuka adi.

Pashiishe kufikaye pàvwà Simona Peetelo; ki Peetelo kumwambilaye ne: Mukalenge, wèwè udi ungowesha mèmè mâyi ku makàsà anyi?

Yesu wakandamuna e kumwambila ne: Cîndi ngenza mpindyewu eci wèwè kwèna mucimanye to...kadi neushishe kucimanya paanyima.

29 Mukalenge asweku asakidile mabeneshu Ende ku kubala Kwende, kwa Diyì. Ndi muswe kwangata bu—bu cyena-bwalu, diloolo edi, anu bwa katanci kîpì cyanaana, cyena-bwalu cya ne: *Bimfwànyì Byà Kilistò*. Ne ndi muswe, bwa cyena-bwalu ne: “Eci ncifwanyine kwikala cinganyi? Bidi bikengela cinganyi bwa kwikala mwena Kilisto?”

30 Mpindyewu, ndi mumanye ne, bwa eci, kaciyena menemene cyena-bwalu cya butangadiki to, nansha bishi. Kadi, nansha nanku, ncyena-bwalu cya butangadiki, bwalu Ekeleeziya kèna mwa kuyaku kumpala padiYe kayi mumanye ne Ûdi wendela pa bishimikidi kaayi to.

31 Ne mèmè ndi ngeela meeji ne kumpala kwa muntu kuyaye kumpala anyi kwikalaye ne diitabuujà dya kweyemenyiibwa dya dilelela edi, bidi ne, dyambedi, bidi bikengela yéyè kwanji kumanya mwaba udiye mwimanyine, ne mushindu wa kwimana paanyima paa yéyè mumane kwimana. Ndi ngeela meeji ne aci ki cîdì ne mushinga munene. Bwalu, kwèna anu mwa

kudyela mu cintu kampanda ne mutu mutàngija panshi, ne diitabuuja, paudi kuyi mumanye ne mûdi wela mùtùki mwine amu mpenyi to. Bikengela wikalè mumanye. Nenku diitabuuja dyetu dyôdi dijaalamija bîmpè, mu mushindu mwîmpè, cidi cifila disankishiibwa dya kashendende.

³² Bidi anu bu mutubo bamba bwa mukaji udi, pàmwâpa, padiye musediibwe, mwikàle ne mwoyi uzuka bikole—bikole bwa kuupukilaku mwanende mukese wa kumpala wa mu diboko, mu mushindu wa kayi umanya...kayi ukumbana bwa kwindila. Kadi yêyè, dizuka dyende didi mushindu awu. Kadi, paanyima paa cyôci aci, padi bwôwà kampanda, pîikalà mwânà awu kayi mwa kumweneka lukasa to, bwa ne nkwèpi kwapangaye kupeta mwine mwânà awu. Dîbà adi aci cidi cimusaka kule menemene, misangu yônsò.

³³ Mpindyewu, kudi bwanga kampanda budibo benza matuku aa, ne bwôbù abu bukaadi bwenzenze mudimu mu bikondo byônsò, mukaji awu yêyè umona anyi wela meeji ne kaadyakulelaku mwine mwânà awu to. Bu yêyè anu mwa kupatuka kuya kapyana mwânà kampanda wa mu diboko, dîbà adi, katanci aka, yêyè nealele wende yêyè. Mpindyewu, aci cikaadi cijaadikiibwe ne cidi mu cyôci, misangu citeema pa dikumi. Bwa dilubakana adi dya didikonka dya ne: “Kaa, pàmwâpa ncyakumupeta to.” Kadi bidi bikengela kaadisankishiibwa kakese aku mwaba awu, ne pàmwâpa mmushindu wa Nzambi wa kumuteeka mu ngiikadilu udi ukengediibwa. Pashiishe neapete wende mwânà sungasunga, bwalu diciina adi ne dizuka nebilwe anu kumuumuka ndekeelu wa byônsò.

³⁴ Mushindu umweumwe awu ngudibi bwa bantu badi baswe kwondopiibwa, bôbò, bu bôbò anu mwa kupeta kaacileeji kakese cyanaana kaa kamweneke aka.

³⁵ Byenze bu Eliya, paakambaye . . . Gehazi kwambaye ne: “Ndi mmona kaadivuba kaa bunene bu bwa cyanza cya muntu.”

³⁶ Eliya kwambaye ne: “Ndi ngumvwa mwadi wa mvula wabûngi.” Ûwva mumone cileeji’s.

³⁷ Ki bwa cinyi, misangu yàbûngi, ntu ngambila bantu ne: “Tungunuka, banga wêwè anu kutumbisha Mukalenge.” Nwamonu anyi? Bwalu, s’ki mwânà mupyana nyêyè awu, bwalu cidi mu meeji a mu mutu wende too ne mwafikaci mu musuuka wende, bwa ne mmwondopiibwe, dîbà adi diitabuuja didi dicijaalamija.

³⁸ Bikengela wikale mumanye cyûdi wenza. Bikengela wikale ne dyeyemena mu cyûdi wenza.

³⁹ Ki bwa cinyi, misangu yàbûngi, tutu tuumvwa cyakwidi eci ne: “Kaa, mwena Kilisto ncinyi’s?”

40 Bamwe bantu batu baciimanyikila anu ku dikashaala wa mu ekeleeziya kampanda. Muntu mukwabo uvwa wamba ne: “Ee, mwena Kilisto’s ncidimba cya—cya ekeleeziya kampanda, mmuntu kampanda udi mudivwije mwena ekeleeziya awu.” Mêmè ndi ngiitabuuja ne beena Kilisto bônso bivwa bikengela kwenzabo cyôci aci, kadi ncyèna ngiitabuuja ne aci ki bwena Kilisto to. Nwamonu anyi? Aci ncidi mwena Kilisto wenza paanyima paa mumane kushaala mwena Kilisto. Kadi kî mwena kwamba, ne, bwalu yêyè udi ùcyènza, nanku wênji mwena Kilisto to.

41 Pashiishe bamwe batu bamba ne: “To. Ndiya dya mu ekeleeziya ne disadila kampanda dya dîyì dya twitabaayi, ne diikala ne lulamatu ku biine bintu bìdì ekeleeziya ulongesha abi.”

42 Ne pashiishe kudi bakwabo bàdì bamba, ne: “Pàmwăpa kwikala wenda mwambule kaacintu kampanda kaa kakese—kakese pambidi, kankuruse kaa—kaa kakese anyi kaacintu kampanda, ne aci ki cimanyinu cya bwena Kilisto.”

43 Ee, ne pashiishe kudi bakwabo paabo bàdì biitabuuja, ne: “Pàmwăpa, misangu mikwabo, bu bôbò mwa kwikala boosha kandeyi, anyi benza didikengesha dya mushindu kampanda, ne ki mwena Kilisto nyêyè awu. Bu bôbò anu mwa kwinyijibwaku mu mâyì cyanaana, anyi kwenza didifila kampanda, anyi kufilaku cintu kampanda ku ekeleeziya, anyi—anyi kwambulwishaku mwena mutumba, kusumbilakù mukaji wa mu lufwila makàla, anyi mwân’a nshiya bisabaata.” Abi mbyenzedi bivwa bikengela mwena Kilisto kwenzaye, kadi aci kaciyena anu cimuvwija mwena Kilisto to.

44 Ne pashiishe bamwe batu bamba, ne: “Wêwè wenda mwambule cimfwanyi cya Kilisto mu mashinyi ebe, anyi ku cimanu cyebe, ne aci ki cimanyinu cya mwena Kilisto.” Ee, bintu abi bidi anu bîmpè, kadi mêmè ncyèna ngiitabuuja ne kwikala wenda mwambule cimfwanyi kampanda kudi kukuvwija mwena Kilisto to.

45 Mêmè ndi ngiitabuuja ne kwikala cimfwanyi cya Kilisto nkùdì kùkuvwijà mwena Kilisto. Kî mbitudi twêtù twenza, pambelupambelu to. Cìdì cyenzeke, lwà munda, ncìdì cituvwija citudi. Dîbà adi, kî bwa cinyi, Yêyè mwikàle cimfwanyi cyetu, ne twêtù biikàle mu cifwanyikiji Cyende ne bidimba bya Mubidi Wende, bivwa bikengela bwa twêtù kwikala bimfwanyi bafwanangane Nende. Dîbà adi bivwa bikengela bwa nsòmbelu yetu kuleejayi cimfwanyi cya Kilisto, kabiyi mu diya dya tukashaala beena ekeleeziya to, anyi kwikala kwenda bambule kankuruse, anyi masaluka etu, kadi bivwa bikengela kwikalabi mu Bwikadi budi ne mwoyi bwa Nzambi udi ne mwoyi bwikàle buleejiibwe ku nsòmbelu wetu.

46 Bakaadi bandondeleku, kudi bamanyi, ne . . . kumpala kwa matuku a mashinyi adi engulula byamu, bwa kuumusha bisota mu—mu ngòlò, bwa kuumusha cyamu cifiike ne bunyingunyingu bwa soufre. Bunyingunyingu bwa soufre mbufwanangane bikole, bwenze anu bu ngòlò wa cya bushuwa ewu, mu mushindu wa babubiikila ne “ngòlò wa muntu mukutakane.” Kadi mushindu uvwabo buumusha byònsò abi, bavwa babyumusha mu kutuuta ne nsandu. Ba-Indiens mbavwa ne ciibidilu cya kwenza nanku. Nenku benji baa bintu bya ngòlò bavwa ne ciibidilu cya kucyenza, bamutuuta ne nsandu, bamukudimuna misangu ne misangu, ne batuuta too ne pàvwà bisota byònsò byumukamu. Nenku mushindu umwepele uvwabo bamanya ne cyayi kafika pa ngòlò, mpàvwà mutuuci awu umona cimfwanyi cyende cidileeja mwômò amu. Yêyè uvwa utuuta awu uvwa anu wenza kutangila, too ne pavwaye mufwanyine kudikungula mwedi, ku cimfwanyi cyende yêyè mwine civwà cidileeja mu ngòlò uvwaye utuuta awu.

47 Nenku pàdi Nyuma Mwîmpè wa Nzambi ubanga kututuuta, ne nsandu wa Evanjeeliyo, too ne pàdi maalu a pa buloba ónsò apatuka ku dituuta adi, ne twètù mwa kuleeja cimfwanyi cya Mukalenge Nzambi, díbà adi ndi ngeela meeji ne ki patudi tulwa beena Kilisto. Bwalu mwaku ewu *mwena Kilisto* udi uswa kwamba ne “mufwanangane ne Kilisto, ne kuMuleeja.”

48 Mpindyewu aci kî mbwena kwamba ne bidi bikengela bwa twètù kuleepesha mwedi to, bu mùdi bazodi baMuzola ne mwedi mule amu. Anyi kaciyena ciswa kwamba ne tuleepeshe nsuki to, bu mùdi bazodi baMuzola mwikàle naayi amu, anyi kuvwala muzabi bu muvwaYe uvwala amu to, bwalu twètù tudi ne mwoyi mu dituku dya cyanaana. Kabyena bikengeka anu bwa twètù kwikala nanku awu to, kî nkuleeja cimfwanyi Cyende cya mubidi to.

49 Kadi twètù, mu misuuka yetu, tudi ne cya kwikala tuleeja cimfwanyi cya Nyuma Wende ne mushindu Wende wa nsòmbelu. Ncyêna mêmè ngeela meeji ne kwikala beena Kilisto nkuya kashaala beena maekeleeziya anyi beena twitabaayi to. Ndi mêmè ngiitabuuja ne cidi ndileeja dya Yesu Kilisto mu muntu, bwalu twètù tudi bidimba Byende, bidimba bya Mubidi Wende, ne tudi bambule cimfwanyi Cyende, mùdi Mufundu wamba.

50 Mpindyewu, Yêyè uvwa cimfwanyi cya mushindu kaayi? Yêyè kaakalwa bwa kwikala muntu kampanda wa munene to; kadi pààbì, ki civwaYe. Kadi Wàkalwa bu musadidi. Yêyè kaakalwa bwa kuMukwacilabo mudimu to, kadi bwa kukwacilangana mudimu. Mufundu wetu, diloolo edi, wùdi wuleeja civwaYe. Ki cidì ciMuvwiya munene ncyòci aci, ku dyanyi dicinka. Kadi, pende mwikàle Nzambi mwine wa Cyendeleele, Nzambi mwine Wàkafùka maulu ne buloba awu; kadi paakalwaYe panwapa, Wàkangata kaaba kaa katambe kushaadila, mudimu wa mutambe kwikala wa kabayiku mwa kujinga to ùdi

muntu mufwanyineku kwikala naawu, ùvwa mmudimu wa mwoweshanganyi wa mâyi ku makàsà.

⁵¹ Ku mafutu ònsò, a mu matuku a kale awu, ku bantu baa ku Esete, mwoweshanganyi wa mâyi ku makàsà nguvwa muntu uvwa ne difutu dya ditambe bukesa ku ònsò. Bwalu, mu matuku awu, nyama yivwa yendela mu bibeeba, byenze ne, tujila tukese twa kumpenga tuvwabo bayiila atu. Nenku mu njila mujima amu, muvwa mununka mupuuya mubole, mu njila mujima amu, mùvwà nyama amu. Ne lupwishi luvwa lujjuuka lubalamata ku mikolo ne ku makàsà. Nenku civwa mupuuya mubole wa kacya, mwine mushindu mwine uvwabi awu! Nenku pavwa anu muntu mwa kulwa bwa kukumbula mukwende, kavva mufwanyine kubwela mushindu awu to. Ùvwa ununka bibi, byumukila ku mupuuya mubole wa mu njila awu, ne lupwishi, byenze bu bya kumpenga kwa—kwa cikumbi cya dilaminamu tubalu.

⁵² Pa nanku, cintu cya kumpala civwaye wenza, uvwa ne kazùbù kakese kaa ku luseke, kazùbù kaa dyakidilanganamu, nenku muntu uvwa ufucii bwa difutu dya ditambe bukesa mwaba awu awu, anu mùdì mupika kampanda amu, ùvwa yêyè ushaadilamu, bwa kwowesha mwenyi uvwa ulwa awu mâyi ku makàsà, nenku umupeesha mukolo wa bisabaata wa cyanaana bwa kuvwalaye, tuusàndalà tukese, bwa kumwelatu ku makàsà. Ne pashiishe bavwa bamwela maanyi, ne, pashiishe, ne maanyi kampanda. Nenku dîbà adi ùvwa ubwela bwa kwikalaye mwenyi wa mulunda wende awu. Bwalu, ùvwa mufwanyine kudyumvwa kayi mu yêyè to, mu kubwela kwende amu, mwikàle pambidi pajima ununkakanangana ne mupuuya mubole wa—wa mu njila awu, mwikàle utuuka bisuululu, ne bikwabo. Nenku mwoweshanganyi wa mâyi ku makàsà nguvwabo bafuta difutu ditambe bukesa ku bònsò bàvwàku.

⁵³ Nenku Nzambi wa mu Dyulu, wakaDipwekesha, bwa kwikala. . . Mutambe bunene wa ku bònsò uvwakù awu wakashaala mutambe bukesa wa ku bònsò uvwakù.

⁵⁴ Dishiilangana kaayipu's, ne mwena Kilisto wa ku dînà, udi udileeja leelu ewu! Dishiilangana kaayipu's we! Mona's, mwena Kilisto wa ku dînà leelu ewu's mmuswe bamukwacile yêyè mudimu. Kaa, yêyè's udi ubanga kudyambidila mudiye kampanda.

⁵⁵ Dishiilangana kaayipu's, dîvwàku, pavwaYe uMuleeja. Yêyè kaakalwaku bwa baMukwacile mudimu to. Kadi Yêyè mwikàle. . . Wàkalwa bwa kukwacilangana mudimu. “Ewu udi mutambe bunene munkaci mwenu ikalè musadidi wa bònsò.”

⁵⁶ Kadi twètù tukaadi bamonemone, leelu ewu ne, mmwenenu wetu twètù wa cyena leelu wa bwena Kilisto udi ne: “Mèmè ndi kampanda, kadi wêwè udi cintu cyanaana.” Kaa, bidi. . . Mbibi. Kabivwa bikengela bwa kwikalabi mushindu awu to. Twètù tudi tuteeta bwa kuleeja bwena Kilisto mu mushindu mubi. Nzambi

kí mmuswe bwa twètù kucyenza mu mushindu awu nansha. Yèyè. . . Tuvwa twimba musambu wa ne, *Kwikala Bu Yesù*, kadi pakaadibi bikengela bwa kupwekesha maditambishi etu, ne bwa kupweka mwakapwekaYe Yèyè amu, apu kaayi tudi tuteeka mukàlù.

⁵⁷ Nanku mu kwenza kwa nanku aku, muntu ukaadi mwenze mangumba, bwa kumonabo mwa kuditapulula, “bimweka bu kabayi ne Nyuma to,” bu mùdì Mufundu mwambe. Badi baditapulula. “Twètù tudi baa ekeleeziya *kampanda*. Yèyè awu ngudi—ngudi ekeleeziya wa mutambe bunene. Yèyè awu ngudi ekeleeziya wa mutambe bwimpè. Dyetu dingumba ki dingumba didi ditambe bunene.” Aci kí ndyenza dya maalù bu Yesu to. Aci kaciyena cileeja dinanga Dyende ne buumùntù Bwende to.

⁵⁸ Yèyè wakalwa kùdì baa batambe kushaadila, kùdì ndumba wa mu mùsèsù, kùdì mulombyanganyi wa kaa pa luse, kùdì mwena kanza koolola, ne wàkapweka too ne mu lupwishi muvwabo. Ki nsòmbelu wa bwena Kilisto nyèyè awu. Ki mushindu úvwàbi bikengela kwikala ngwòwù awu, bwa kuMuleeja Yèyè mu mushindu awu.

⁵⁹ Kaa, ndi mumanye ne bantu batu bamba ne: “Aci ncyà—aci ncyà matuku àkaadi mapite.” Kí nnanku to.

⁶⁰ Pìikalàbi ne Kilisto uci di anu Kilisto, pìikalàbi ne Nyuma Wende uci di anu Nyuma Mwimpè uvwa munda Mwendè awu, mwikàle munda mwebe wèwè, Yèyè awu’s neakufikishe ku dyangata peebe kaaba aku, wèwè.

⁶¹ Kadi, leelu ewu, tudi twètù tuteeta kudyambidila ne tudi bashiilangane. Mushindu mwine udici cishiilangane kule ne kule ne disambila Dyende, paakasambilaYe, ne: “Ku cyòcì eci bantu bònsò bavwa mwa kumanya ne tudi bayiidi Bende, patudi ne dinanga muntu bwa mukwende.”

⁶² Kadi pamutu paa cyòcì aci, tudi tukokangana muntu ne mukwende. Tudi tupeetulangana muntu ne mukwende, anu bwalu katwena tupetangana ku mèyì pa tumwe tuntu. Kabidi tudi tuya ne—ne tukafundangana muntu ne mukwende, nwamonu’s, mwaba udi. . . kadi nansha nanku tulaka anu mukana mutudi beena Kilisto. Mèmè ndiku mumanye bantu bàtù balaka mukana bamba mudibo bùle tente ne Nyuma Mwimpè, biikàle bapiile ku bintu bya mushindu awu, baya benda—benda bamba bintu bibi byetu bya cya bushuwa ebi bwa bakwabo beena Kilisto. Pààbì, kabivwa bikengela kwenzabo bintu abi to. Mpindyewu, mwaneetu wa balume, mwaneetu wa bakaji, patudi ne nyuma wa mushindu awu, mbipiciibwe ne twètù baditeekele mu meeji ne katwena banji kwikala beena Kilisto to. Bitudi tulaka mukana twamba abi nansha biikàle binganyi, citudi naaci ncìdì ne bwalu. Nwamonu anyi? Katwena mwa kwikala beena Kilisto katuyi tunanga bantu bònsò to. Tudi bafwanyine kwikala katuyi tupetangana ku mèyì ne bantu.

63 Kadi, Yesu kaakadileejaku wamba ne: “Ee, mpindyewu, mwaba ewu, nwênù bônso Bafaalesa aba, nuyaaya bônso mu iferno. Kabidi kakwenaku mpunga bwenu nwênù to, bwa *cikampanda*, *cikansanga*, anyi *cikankènga*, bwalu wèwè udi Mufaalesa.” Kadi Yèyè wakaya kudibo, ne Wàkabàkwàcila mudimu, ne Wàkabàmbulwisha. Wàkenza cyônso civwaYe pende mwa kwenza aci, bwa kubambulwisha.

64 Kadi, leelu ewu, malonga a tulaasa, ne buumambala bwa ekeleeziya, ne myonji ya maalu a pa buloba mbisangishe ekeleeziya pamwe mu mushindu wa ne bya mamanya a mu mutu bikaadi byangate kaaba kaa bya mu nyuma.

65 Kwèna mwa kufika kudi Nzambi kakuyi ku Nyuma to. Kudi mushindu anu umwepele udi muntu mwa kufika kudi Nzambi, nku Nyuma Mwîmpè. Yesu wakamba ne: “Muntu nansha umwe kèna mwa kulwa kûNdi to, pàdi Taatù kayi mumukoke, dyambedi.” Aci’s ncyà bushuwa anu bwa menemene ebu, wèwè mwena Kilisto.

66 Tudi baswe kwangata kâlùpê kakese, diloolo edi, munda mwa mwoyi wetu, bwa kubalulula maalu aa mpindyewu. Twänji twèlààyibi meeji aa.

67 Kaa, bamwe baa kutudi badi balaka mukana bamba mudibo ne dimanya dyônso. Tudi ne bàdi bamba ne: “Mpindyewu anji indila tûng!” Mbanange kwikala ba-“docteurs” ne “baataatù bansantu,” ne bikwabo. Kadi mwikàle ne dimanya dya biine byônso ebi, bu ne uvwa ne dimanya dyônso, kî ndifwanyineku kukukwacisha to pawikalà (wèwè) kuyi ne Nyuma munda mwebe, wa dinanga. Bible mmwambe ne: “Nansha mèmè mwikàle ne dimanya dyônso, kadi nciyi ne dinanga to, ndi cintu cyanaana.”

68 Kadi dimanya dyetu didi ne dikwacisha kaayi, pàdi muntu kampanda wamba ne: “Ncyèna mufwanyine kuya ku ditabuluja dya mushindu awu to, bwalu bantu abu kî mbalonge kalaasa to. Ncyèna—ncyèna mufwanyine kuswikakanaku naabo to?”

69 Nansha bôbò bamanye ABC, anyi kabayi bamanye to, badi mwa kumanya Kilisto. Ncyà bushuwa ne kwènakù mwa kupweka kupicisha to. Nzambi asweku alame Nyuma awu munda mwanyi. Nansha byôbi ne—byôbi ne yèyè mmupweke bishi, cidiye witabuuja, cidiye kayi witabuuja, twitabaayi kaayi, diikala kaayi, anyi nîncinyi, ndi mèmè muswe kwolola cyanza ne kumwambulwisha. Cya bushuwa. Ndi muswe Nyuma awu ikalè munda mwanyi. Ncyakudyambidilaku ne ndi mwîmpè kupita muntu mukwabo to; ndi mufwanyine kutadika cyàdi, kwamba ne: “Bantu bônso badi bajuuka kuulu pândi mèmè mbwela,” anyi ne: “Mèmè ngudi ne kampanye kanene kapite twabo twônso.” Mèmè mwine ndi nganyi’s, twamb’eku twamb’eku, piikalàci kaciyi anu diima didi Nzambi mufwimbe? Ndipwekèshè, bwa mwoyi Wende umweneshiibwe. Twètù bônso, beena

Kilisto, tùdyǔmvwàyi mushindu awu. Dimanya kadyena ne kwatufikishadi to.

⁷⁰ Cileejilu, ambaayibi tǔng bu ne kudi nsanji mùle tente ne tunyuunyi twa lùlambà, ne mwine nsanji awu mwikàle bunene bwa tabernacle ewu? Ne bu kanyuunyi kamwe kaa lùlambà kubuukaku ne kubàndakù muulu mwine mu nsanji awu, kamba ne: “Balumyana, ndi muswe nnwǎmbilèku nwènù bônso aba cintu kampana. Mbyenzeke ne mèmè ewu ngùikalèku anu munutambidile nwènù bônso ndambu. Nudi numona’s, mèmè ndi—mèmè ndi kanyuunyi kaa lùlambà kadi kamanye byónso pa bidì bitàngilà bantu. Kaa, mèmè’s ndi mwa kubyumvwija byónso. Nkaadi mumona inǎbànza wenolakana mu nzubu. Nkaadi mumona bǎna banaya. Ndi mumanye byónso. Mpindyewu nwènù bônso nunteelejaayi mèmè.”

⁷¹ Kadi anu pa dǐbà diine didiku kadisalula kaabwongò kààkù kakese aku, muntu mukwabo wa mu cilongelu citumbuke cya Université wa Princeton umba uvwilapu, ne mwakulu wa kapelu. Ki ùbanga mwaba awu muyiiki ne kanyuunyi kakese kaa lùlambà aku, wàkula mwakulu wa mutambe kutumbuka uvwaye pende mwa kwakula naawu awu, wàkula ne kanyuunyi kakese kaa lùlambà aku. Ndi mwa kudifwanyikijila mùvwà kakwacikwetu aku kafwanyine kutuma mutu ku luseke. Kavwa mwa kwenza kaatelejila elu luseke kaatelejila elu luseke, kadi kakayi kamanye kantu nansha kamwe kaa bidì yèyè awu wakula to. Kadi pààkù’s, kadi mwa kumuumvwa. Kadi pààkù’s, kadi mwa kumumona. Kadi dimanya dyaku adi didi ne mushinga kaayi? Cijengu. Bwalu, kòkò kǐ nkamanye cidì muntu awu wamba to. Bwa cinyi? Kòkò kadi ne bwongò bwa kanyuunyi kaa lùlambà. Kakeena ne bwongò bwa muntu to. Kòkò kadi kumvwa anu mùdì tunyuunyi twa lùlambà tuumvwa amu.

⁷² Nenu mushindu awu ki udi muntu. Nansha wèwè mwikàle mwena mamanya a mu mutu wa bishi. [Mwaneetu Branham udi utuuta bintu pa cyambilu misangu yitaanu—Muf.] Twètù tucidi anu ne bwongò bwa tunyuunyi twa lùlambà abu, bwalu’s tudi anu bantu. Nzambi batu baMumanya ku Nyuma, ne ku dibuulula dya kùdì Nyuma Mwímpè. Katwadyakukumbanaku bwa kuMuumvwa ku mamanya a mu mitu to. Nudi bafwanyine kwakula, ne kubwela ne kwenza masangisha a mamanya a mu mitu awu, ne bintu bya mu meeji mu bùngì bwónso bunwaswa abu, kadi bantu bòbò kabaakumanyaku Nzambi to. Kabeena mwa kumanya to.

⁷³ Udi mwa kuumvwija kwamba ne bantu bàdì beela mbila ne bakudimuna ditama dikwabo abu badi anu baa cyena kale, kadi pende yèyè awu’s ki muntu mene udi uleeja Kilisto mu nsòmbelu wende. Muntu udi mudipwekeshe, muntu udi muswe kwenda ne Nzambi, yèyè awu neénzè maalù bu Yesu.

⁷⁴ Kadi, nudi numona's, kanyuunyi kakese aku kakavwaku mwa kuumvwa to, kadi pààkù's kavwa kadyambidila muvwaku kafwanyine kuumvwa. Bwalu, kî nkenjiibwe mushindu awu to. Àkù mamanya a mu mutu kaàkufwànyikijiibwaku ne mamanya a mu mutu a mulongi wa meeji matwe ewu to.

⁷⁵ Nansha etu mamanya a mu mitu kaàkukùmbananganaku ne Nzambi to. Mmuniyi mùdì etu meeji adi makeke ne kaàyi ne mikàlù aa, mwa kukumbanangana ne meeji adi ne mikàlù; anyi meeji etu twètù adi ne mikàlù aa mwa kukumbananganaku ne meeji a Nzambi àdì kaàyi ne mikàlù? Meeji a Nzambi adi kaàyi ne mikàlù awu mmatambe kule ne kule mamanya a mu mitu a bantu mu mushindu wa miine aa kaàyi mafwanyine kwikalaku mene to.

⁷⁶ Mushindu umwepele ùdì kanyuunyi aku kafwanyine kumanya cìdì muntu awu wamba, ngwà kudilekelela ne kuciitaba, ne kwenza cyònsò cidiku keela meeji ne ncìdì muntu awu muswe bwa kwenzaku.

⁷⁷ Awu ki mushindu umwepele utudi twètù tumanya Nzambi, ngwà kulonda bulombodi bwa Nyuma Mwîmpè. Aci ncyà cyena kale. Ndongamu wa Nzambi. Citu misangu yònsò anu ndongamu wa Nzambi. Necìikalè misangu yònsò anu ndongamu wa Nzambi. “Kî nku bukole, kî nku ngulu to, kadi nku Nyuma Wanyi, mùdì Mukalenge wamba.” Ki kùdì bwalu bukafika nkwòkù aku.

⁷⁸ Musangu kampanda Longfellow wakamba nunku ewu: “Mushindu wa kutuuta dyakalenga ngwà kupeta kabingila kaa mushinga kàdì bantu bamba, kabingila kaa mushinga kàdì bantu bamba, ne pashiishe kushaala mukwateku.” Cya bushuwa. Cintu kampanda cìdì bantu bamba, cidyombola kùdì—kùdì maalu a mamanya, nenku, pìikalàbi ne ncyà mushinga, dîbà adi kushaala mukwateku.

⁷⁹ Nudiku bamanye ne, mu cidimu cya 1872, Nsangilu wa Bangangabuka wa États-Unis wakadyombola ma-baignoires [malongo manene a dyowelamu mâyi mu cyowedi—Muf.] anyi? Baakamba ne: “Kakuyi mpatà to òwò awu ngya afila màsaamà.” Ki kwambabo ne: “Neatampakaje màsaamà.” Ma-baignoires awu's; ndekeelu wa byònsò kulwabo kuupukaku.

⁸⁰ Nenku Evanjeeliyo wa cyena kale utudi twamba ewu, musukula mu Mashi a Mwânà wa mukooko! Mmufwanyine kumweka wa cyena kale, kadi nebiikalè anu ne cya kuupukaKu, nansha ku tootooto nansha ku ndandanda. Nkabingila kaa mushinga. Shaalaayi bakwateKu, ne mwenu mwònsò. Nnjila musukula ne Mashi adi asukula muntu amutookessa zeezeeze; kî nkupatuka apa, kwenda kunwa maala ne kunwa mfwanka, kadi kudikungwija ne kudibiikila mudibo “beena Kilisto” ne bwalu nyawu mbaa mu ekeleeziya kampanda to. Bwalu mbwa Nyuma

Mwîmpè, mukezuke kayi musambakaja awu mu nsòmbelu wa muntu, mwikàle uleeja Yesu Kilisto Mwànà wa Nzambi.

⁸¹ Ki bwa cinyi leelu ewu bantu badi babenga Dilediibwa dya cyakabidi. Kaa, bôbò's badi ne cidibo babiikila ne n'Dilediibwa dya cyakabidi aci, mushindu kampanda wa dilabulangana dya ku cyanza ne mpaasata, kadi aci kî n'Dilediibwa to. Cidi cyenza ne bôbò. . . Bôbò kabaakuDiitabaku to. Ki bwa cinyi badi baya kashaala beena maekeleeziya, mbwalu badi mwa kubwelamu mu mushindu kampanda wa mamanya a mu mitu.

⁸² Nzambi mmwambe ne: “Muntu yêyè kayi mulediibwe cyakabidi, kèna nansha mwa kumona Bukalenge bwa Nzambi to.” Nansha wêwè mwa kwikala ne mamanya a mu mutu a bishi, anyi nansha wêwè mwa kulaka mukana wamba mùdi mwena Kilisto mwîmpè, bikengela ulediibwe cyakabidi.

⁸³ Wêwè udi wamba ne: “Dîbà adi, Mwaneetu Branham, nebikengele bwa mêmè kulwa ku kaacitanda kakese kampanda anyi?” Kacyena cyumvwija aci to. Cidi cyumvwija ne bidi bikengela bwa wêwè kupeta Dilediibwa dya cyakabidi. Bidi bikengela ulediibwe cyakabidi.

⁸⁴ Bateeleji aba mbasambakane, kadi ndi muswe kwambaku cintu kampanda. Dilediibwa ncinyi? Dilediibwa dyôdi dyenzekele pa màâtêlâ a bisoosa, anyi dyenzekele panshi mu buloba, anyi mu lupitaadi mùdi bibambalu bilengeja ne swâ wa diikala dikunzubile, ditu anu bukooya, mushindu wònsò unudi nudyangata awu. Ncya bushuwa.

⁸⁵ Ki mudibi kabidi bwa Dilediibwa dya cyakabidi. Mbukooya, mushindu wònsò unudi nuDyangata awu, kadi Didi ditwala Mwoyi. Amen. Didi ditwala Mwoyi. Mwoyi wa mushindu kaayi? Mwoyi wa busadidi, bwa nwênù kudipwekesha, bwa wêwè kudibenga wêwè mwine. Ki mushindu wa Mwoyi ngwôwô awu. Kaa, badi bamba ne: “Kadi's nkaadi mubamone badila myadi ne babingila mu nyungulukilu wa cyoshelu ne benza maalû a lukutukutu.” Cya bushuwa. S'badi munkaci mwa kulediibwa. S'mbukooya, kuwaya kwònsò aku nansha kwikàle penyi. Udi mufwanyine kujuuka, kwîsù kwònsò eku ne binsonji tente, ne mèsù makunze kunzuu, ne byanza bishaale bikusaama ne dituuta dya bintu pa cyoshelu, kadi's n'Dilediibwa. Didi dikwenzela cintu kampanda. Didi dikuvwija musadidi. Didi dikumusha dyumakana adi. Didi dyanza cimfwanyi, difwimba Mwoyi mupyamupya, bufuki bupyabupya. Udi mufwanyine kwikala mushaale ne bukooya pambidi pajima, paudi ujuukaku apu, kadi udi mulediibwe cyakabidi. Nansha wêwè usanganyiibwa penyi, didi dyanza Mwoyi mupyamupya. Didi dyanza Mwoyi wa cimfwanyi cipyacipya. Didi dikuvwija musadidi. Udi ujinga kukwacilangana mudimu, dîbà adi. Yesu mmuswe bwa twêtù kwikala tukwacilangana mudimu muntu ne mukwende, tunanga—tunangangana muntu ne mukwende. Ne

patudi tukwacilangana mudimu muntu ne mukwende apu, Yêyè ngutudi tukwacila mudimu awu.

⁸⁶ Mpindyewu, vulukaayi ne, anu mubeedi ngutu ulomba dimubeeja, dimukwacila dya mudimu. Anu mubeedi, yêyè ngutu ulomba dimubeeja. Kadi paudi umona muyiishi kampanda. . . . Nenu swayi nciikadi mucimanyikile anu pa muyiishi to, kadi ncimanyikile pa cidimba cyônsò cya ekeleeziya cidi dijinga ne dimutabaleela ne: “Mêmè ndi kampanda” awu, nuvulukaayi anu ne, ki mubeedi wa nyuma nyêyè awu. Ûdi ujinga dimubeeja. Ûdi ujinga dibeeja dya Nyuma wa Nzambi, bwa kumupeesha cintu kampanda ciikalà mwa kuumumusha lwidi alu, ne kumwondopa ku budisu bwende abu ne mmwenenu ya didimona ayi, ne ya ne “munene mmêmè ne mukese ngwêwè” ayi. Nyuma Mwîmpè udi utuwwijia bônsò baa mwomumwe.

⁸⁷ Bubeedi bwa nyuma bupitepite bûngi, bajike mashi! Nutu bamanye disaamà dya dijika dya mashi ne ncinyi anyi? Mmuntu kampanda udi kaciyiku ne mashi to. Ûdi yêyè wenda byenze anu lukutukutu’s. Ûdi wenda ùtetuka, watwa eku watwa eku bu mukwacike maala, dîbà dyônsò. Nenu ki lutatu lùdi naalu bidimba byetu byàbûngi bya ekeleeziya leelu ewu ndwôlo alu. Mbajike mashi. Bidi bibakengela dibeela dya Mashi, dya ku Kalvariyo, diikalà mwa kubapeesha Mashi mabanjike, a bumfumu, bwa kubafikisha ku dyenda lwendu lwa mushindu wa cyena kale, lwa Nzambi lusonga kudi Nyuma Mwîmpè. Aci necibapeeshe cintu kampanda cya kwikadilabo ne mwoyi, cibapeesha dyeyemena diikalà mwa kubafikisha ku dyenda mu cimfwanyi cya Mukalenge wabo.

⁸⁸ Bwanyi mêmè mwine, bu ne mvwaku ne disungula dya dyenza, ndi muswe bwa kwikala bu muvwaYe Yêyè amu. Yêyè wakalwa bwa kwikala mulami wa mikooko, ne Yêyè uvwa mulami wa mikooko. Mulami wa mikooko ng’ewu udi wenda ukebangana ne mikooko yende.

⁸⁹ Dizola dya dimanyike bîmpè, ngeela meeji ne katwena naadi ku cimanu cyetu eku to, kadi mêmè ntu musômbe mu cibambalu cyanyi ne ntapaku dîsù. Ncyêna anu mwa kuvuluka ne muzodi mwine awu dînà dyende ùvwa nganyi to bwa pa dîbà edi. Kadi paakajimijaye kaamukooko kakese, kafiike aku, ne padiye ushiya makumi citeema ne citeema ayi bwa kuyaye wenda ukebangana naaku kôkò apu, cidiye wenza ncinyi? Ûdi wenda ulaluka mu myaba ya bipeela amu. Wenda utapika nyîny’a cisôngà. Ûdi upicila mu njiwu. Wenda wôngwela bufuku bujima. Too ne, ndekeelu wa byônsò, lwà kwînshi kwaka ku luseke lwa mukuna, mukûlâme ku luseke lwa kiitwitu kakese, bya mufwanyine kujimija wende mwoyi yêyè mwine, wolola cyanza upatula kalumyana aku mu mushindu waku wa kadishinde awu, dîbà adi ukaalujulula kudiye yêyè mwine.

⁹⁰ Kadi muzodi mukwabo yêyè mmumuzole mwikàlè ùkaadi walukila naaku kumbelu. Mpindiyewu, bidi bimweka anu bu ne mulami wa mikooko awu uvwa anu mufwanyine kubweja diboko mwinshi mwa mukooko awu, ne kubanga kuya naawu mushindu ewu. Kadi nukaavwaku bamone mushindu uvwa nyuma mukwate kaloosu kaa muzodi awu aku anyi? Yêyè kaakawuteeka mwinshi mwa diboko to. Wàkawùtèèka pa makaaya. Mpindiyewu ndi muswe bwa numone bukubi bwa mulami wa mikooko ewu.

⁹¹ Mpindiyewu, Yesu, pavwaYe wipata badémóns, Yêyè wakamba ne Úvwa uyiipata ne munu wa Nzambi. Mpindiyewu, démon yêyè ukutacisha, cintu cimwepele cidi cikèngelà, bwa Nzambi, yêyè udi—yêyè udi anu—anu kayi ne mushinga nansha mukese to mu mushindu wa ne Yêyè udi wangata anu munu Wende cyanaana kadi kumwipata.

Kadi padi mukooko walukila kumbelu . . .

⁹² Citupa cya mubidi wa muntu cidi citambe bukole nцитупа kaayi? Mpaa makaaya ende apu. Nutu numona mushindu ùdi muntu, misangu yònsò, makaaya ende mu diwu matambe kwikala manene anyi? Mmwaba kaayi udiye mwa kwambwila bujitu bwende bwa butambe bunene? Mpa makaaya. Mmwaba kaayi udiye mwa kwikala naawu ne ditwishiibwa dya menemene? Mpàdì bujitu bucyàmakaja pa makaaya apu.

⁹³ Pa nanku yêyè udi wangata mukooko awu, uwucyamakaja paa makaaya ende apu, ne wasa lwendu walukila naawu bituulubituulu. Makole ònsò a Nzambi, makùta mu kalumyana kakese, kajimine aku, wènda wàlukila naaku. Kadi bwa démon yêyè, anu bipeepele peepelee, Yêyè udi umwipata anu cyanaana, ne munu Wende. Yêyè mmulami wa mikooko.

⁹⁴ Bitu bikengela bwa mulami wa mikooko apambuke, bwa kupetaye udi mupambuke awu. Ne mpaasata mulenga utu mulami wa mikooko. Bwa kwamba menemene, mwaku ewu—ewu mpaasata udi wumvwija “mulami wa mikooko.” Ne misangu mikwabo, mu ekeleeziya, kasumbu kampanda—kampanda anyi kaadingumba kakese nekajuuke mu ekeleeziya; luseke lumwe neluye mu mushindu kampanda, ne lukwabo luseke neluye mu mukwabo mushindu. Mulami mulelela ne mwîmpè wa mikooko, neaye ne kaadingumba aku, (Bwa kwenza cinyi?) bwa kubaalujaye. Mulami mulelela wa mikooko, wa cya bushuwa, cidiye wenza aci ncinyi? Neapambuke, yêyè mwine, (Bwa kwenza cinyi?) bwa kwalujaye bàdì bajimine abu. Cidiye wenza aci ncinyi? Ùdi uleeja cimfwanyi cya Mulami mwîmpè wa mikooko, ùteeta bwa kupetulula musuuka awu. Kadi pààbò, mbaye kule mu mwaba kampanda, mwaneetu, byenze bu ne bavwa bapandulula buloba, pàmbà bufuku kucya. Mpaasata awu yêyè nealonde anu kulonda, anu bwa kubaalujaye cyakabidi, bwa kubapetululaye cyakabidi ne kubaaluja mu njila

ewu. Ki mulami mwîmpè wa mikooko nyêyè awu. Ûdi uleeja cimfwanyi cya Yesu.

⁹⁵ Mwaneetu, ndi mumanye ne aci batu bacibiikila ne mbwabuludyanganyi. Batu bacibiikila ne ndikolesha dya maalu. Kadi bu ne mwkala ne disungula dya dyanza, diloolo edi, dyanyi disungula ndifwanyine kwikala dya kwikala mufwanangane Nende. Ndi muswe ne, nî ncinyi nî ncinyi mu wanyi nsòmbelu, cileeje cimfwanyi cya Mukalenge Yesu, nsòmbelu wanyi mêmè.

⁹⁶ Nyaaya, paanyima paa maalaba diloolo, paanyima paa dibaka edi, nyaaya mu myaba ya cipeela. Ndi mupangadika bwa kuya kashaalamu, bwalu, lwà munda mwa musuuka wanyi menemene mwamwa, ndi ndyumvwa ne ndi dijinga ne lwendu lwa sheemàsheemà ne Nzambi, kutamba cîndi eci. Ncyèna muswe anu bwa kwikala kwenda cyanaana to. Ntu nteeta bwa kwikala kwenda mu mushindu mujaalame, kumpala Kwende, kadi ndi—ndi njinga lwendu lwa sheemàsheemà Nende. Pàcìdì Branham Tabernacle wenza ditabuluja apa, ndi muswe ngìikalè naadi, mêmè mwine. Ncyèna muswe bwa kwenzekeladi anu mu citanda emu nkaayaamu to. Ndi muswe bwa kwenzekeladi munda mwanyi. Ndi muswe lwendu lwa sheemàsheemà. Ndi muswe Nyuma Mwîmpè wa mutambe bûngì menemene munda mwanyi, bwa kuleeja Kilisto munda mwanyi. Ndi muswe kwikala mufwanangane Nende Yêyè. Ndi mumanye ne mwena Kilisto yònsò mulelela—mulelela ewu mmuswe kwikala mufwanangane Nende. Ki dijinga dya mwoyi wanyi ndyòdì adi, dya kwikala mufwanangane ne Yesu. Yêyè. . . Mona's, ndi muswe bwa Yêyè kwikala wanyi. . . ndi muswe bwa Yêyè kwikala. . . Yêyè ki cyanyi cileejiu cya cîndi mêmè muswe kwikala.

⁹⁷ Nenku, tangilaayi, nebikengele Nyuma Mwîmpè bwa kwenza ciine aci. Anu aci ki cintu cimwepele cìdì mwa kucyenza. Ncyèna mêmè nsankishiibwa kudi ma-seminere ne bidì muntu kampana mwa kungambila abi to. Ncyèna ncyuka bya kwikala kutwa tunkuruse mishiku, anyi bya kwikala kutwangata ne kushaala mututeekele pa mwoyi webe, anyi bya kwikala kwambulula masambila a bafwe abi to. Ndi mêmè nsankishiibwa kudi cintu cimwepele, ncyà ne, Nyuma Mwîmpè wa mutambe bûngì akwate William Branham ku bukookeshi Bwende. Ncyèna mêmè nsankishiibwa kudi bya diya kashaala mwena ekeleeziya wa mutambe bunene mupite ùndì ewu abi to. Mêmè ndi wa mu Ekeleeziya mulelela wa Nzambi udi ne mwoyi, wa Baanaabute. Ntu mulediibweMu. Nenku ndi muswe Nyuma Mwîmpè wa mutambe bûngì mu nsòmbelu wanyi, bwa kwikala kuleeja Kilisto Ùndì munange awu. Nansha ciikalè mwaba kaayi anyi cipidì kaayi cìdì cikengela bwa mème kufika, bwa kucipeta. Ncyèna ncyuka ní bidì bikengela kuya mwaba *kampana* anyi mwaba *kansanga*, kubiikidiibwa “mukoleshi wa maalu, munsantu mubunguluki wa mu malaba,” nansha

cyòcì mwa kwikala cinyi. Ndi muswe mêmè Mwoyi Wende wa mutambe bûngì uleejiibwe. Ncyêna mêmè cilumbu ne bya ne mmu mwaba kaayi mudi mukengela mêmè kuvwila to. Mêmè ndi nsankishiibwa kudi Nyuma Mwîmpè, bwa ngaamona mwa kutamba kwikala musadidi muvwaYe Yèyè amu. Yèyè uvwa musadidi wa Mukalenge. Kaakalwaku bwa kuMukwacilabo mudimu, anyi bwa kuMubeejabo to, kaakalwa bwa kuMubeejabo Yèyè to. Kadi, bwa kwikala kusadilangana, Yèyè wakangata mwaba wa musadidi.

⁹⁸ Nenukù pîikalâbi ne Mfumu wa mu Dyulu uvwa mwa kwenza nanku, ne twètù biikàle bidimba bya Mubidi Wende, twikalaaayi bônso mushindu umweumwe awu; kî nkwikala bashiilangane to, kadi biikàle tudipwekesha mu Bwikadi Bwende. Nansha cìdi baa pa buloba ne cya kwamba ciikàle cinganyi, anyi bantu beena mamanya a mu mitu, katwedi meeji nansha makese pa biine abi to. Anu kupeta Nyuma Mwîmpè mukwabo wabûngì, ne kwikala bafwanangane ne Yesu. Mudipwekeshe, ne bupole bwônso, wa mmwenekelu mupwekele, wangata kaaba Kende, ne Yèyè neangate keebe wèwè ku Cilumbulwidi.

Twinyikaayaaku mitu yetu bwa katanci kakese cyanaana.

⁹⁹ Ndiku mufwanyine kumona, diloolo edi, cisumbu cya byanza mu citanda emu, bya bidimba bya ekeleeziya ewu ne bya ekeleeziya mikwabo anyi? Pàndi ngamba ne, “ewu ekeleeziya” apu, ndi njinga anu kwamba ne . . . Kudi Ekeleeziya anu umwepele, mbwena kwamba ne Ekeleeziya wa Balediibwe cyakabidi, Ekeleeziya wa Baanaabute, Ekeleeziya wa Yesu Kilisto, udi kayi mulela kudi buloba to, kadi mulela kudi Nyuma wa Nzambi. Ndiku mufwanyine kumona cisumbu cya byanza byèdiibwa muulu, bwa kwamba ne: “Nzambi, ungenzoku mufwanangane ne Yesu. Umfwimbeku, Èyi Mukalenge. Unsukuleku, Èyi Nzambi” anyi? Nzambi abeneshe mʻoyi yenu. “Unsukuleku, nenku nêngìkalè mutooke kutamba nêjè.”

¹⁰⁰ “Mukalenge, kudi tuumajita tukese ne tuubinkònyà mu nsòmbelu wanyi. Ndi musòmbè, nteeleja Mwaneetu Parnell, ne Mwaneetu—Mwaneetu Neville ne bambi bakwabo balenga aba, ne Mwaneetu Collins ne bàabûngì baa ku bânà beetu bàdi bàyiishà abu. Ndi muteeleje. Kadi, Mukalenge, diloolo edi, nyewu ndi mufike ku dyoya dya mwanda edi ne: Cidibo bangambila ncinyi? Cidibo bateeta kufikisha kùndi ncinyi? Ndi mmona ne badi bateeta bwa kumfikisha ku diikala mufwanangane ne Yesu. Kadi pàakù kakwenaku mushindu nansha umwe wa mêmè kucyenza to. Mêmè—mêmè nyewu ndi nkashaama. Ndi ne makeji makeji, nenku, mêmè muâlâke, ndi ngavwija anu matambe kutooka. Adi alwa anu matambe kumweneka patooke kumpala kwa baa pa buloba. Mukalenge, enzaku ndijimije mêmè mwine. Ncyêna ncyuka ne mbukooya bwa mushindu kaayi budibi bimweka to, bwa baa pa buloba. Ndi muswe kulediibwa cyakabidi, ku Nyuma wa Nzambi. Ne

ndi muswe bwa Wêwè, Mukalenge, kungujaku, diloolo edi, ne Nyuma Mwîmpè Webe. Nsukùlèku. Njidilèku. Angataku Mashî a Yesu, unjidile, unkezule. Nenu unguujeku, mu mushindu wa mêmè mwine ndijimija, ne ndipeta, Mukalenge, mu Wêwè amu.”

¹⁰¹ Éyi Mukalenge Nzambi, Mufuki wa maulu ne buloba, Wêwè wâkabiîsha cyakabidi Mukalenge Yesu ku bafwe awu, muMubiishe ku Nyuma udi ufuululula wa Nzambi wa Cyendelele awu, mujuule mubidi wûvwâ Wêwè musòmbèlemù awu, ne muwùbândishe ku Nkwasa wa butumbi wa mu Dyulu.

¹⁰² Yèyè wakalwa kudi bàvwâ batambe kwikala bashaadile bàvwâ bàsanganyiibwâ pa buloba, bandumba, ne kushaala musadidi wa mutambe kushaadila, muye ku cimenga civwâ citambe kushaadila, kusòmba pamwe ne bantu bàvwâ batambe kushaadila, kupeta dîna divwâ ditambe kushaadila, ne kulwa mutambe kwikala mupele wa ku bapele. Nansha mene bwa bufuki: “Nyuunyi yituku ne maswa, ne mikenge yituku ne meenâ, kadi Mwânâ wa muntu kavwa ne mwaba wa kuteekaYe mutu to.”

¹⁰³ Kadi, pààbi, Nyuma udi ufuululula Wâkatwâ Musadidi mulelela mushinga wâkadivwija Yèyè mwine musadidi awu, bwa twamona mwa kupeta cileejilu cya kulonda, Yèyè awu ngwâkaMujuula mu biina bya iferno, mupicishila mu lukita. Ne kupatula mubidi awu, ne kuwuteeka mu Maulu a maulu, mu mushindu wa ne Yèyè wâkabândishiibwa kuulu kule menemene bya bikengela Yèyè ikalè mwiname mutangile panshi bwa kumona maulu. Ne kuMupa Dîna didi kumutu kwa dîna dyònsò ditù dîbîkidiibwâku ne ndîna adi, ne mu maulu ne pa buloba.

¹⁰⁴ Mukalenge, swaku bwa tupeteku Nyuma Wende awu, diloolo edi. Swaku bwa cyôci aci ciikalè nzala ya mwoyi wònsò mwab’ewu. Wêwè wamonu byanza bìdi byediibwe muulu abi, Mukalenge, kaciyi bwa kwambulula kwa twitabaayi, anyi kaciyi bwa kuya kashaala beena maekeleeziya, anyi—anyî bwa kukokangana pa bintu *kampanda*, anyi *kansanga* to, kadi bwa kwikala badipwekeshe munda mwa myoyi yetu, bwa kuvwijiibwa bakumbanangane ne cimfwanyi cya Nzambi. Swaku bwa byenjiibwe nanku kùdi Nyuma Mwîmpè, Mukalenge. Swaku bwa Nyuma Mwîmpè wa Nzambi àtwènzè nanku. Kabiyi ku mmwenenu wa mamanya a mu mutu, a ne: “Bivwa bikengela bwa twètù kwikala, ne netucitentula” to, kadi, awu’s mmwânâ mupyana’s. Kadi, Mukalenge, swaku bwa cyenzeke bulelela ku Nyuma Mwîmpè, ne Dilediibwa dya cyakabidi didi ditùshintululâ adi, ku divwijiibwa dipyadiya dya. . . dya nyuma wetu, bwa kutuvwija twètù bafwanangane Nende.

¹⁰⁵ Umvwaku disambila dyanyi, Mukalenge. Nдитекете. Ndi mumanye, Mukalenge, ndитекете. Ncyèna nsambidila anu aba bàdi beele byanza byabo muulu to, kadi bwa byanyi paanyi

byanza bìdì byela muulu ebi. Mvwijèku mufwanangane Nende. Nzambi, cyûdì Wêwè ne bwa kungenzela nansha ciikàle cinyi, bipidi bìdì bikèngelà bwa mèmè kulwilamu nansha biikàle cinyi, mvwijèku mufwanangane Nende. Ndi muswe kufwanangana ne Yesu, munda mwa mwoyi wanyi. Enzaku nanku, Mukalenge. Ciine aci kaciyi anu mèmè to, kadi enza bônso bàdì apa aba, diloolo edi, mushindu awu. Enzaku nanku, Taatù, bwalu tudi tulomba nunku mu Dìnà dya Yesu. Amen.

¹⁰⁶ Buumbambala bwa ekeleeziya budi anu bwîmpè. Ncyèna naabu cilumbu anyi nî ncinyi nî ncinyi cya ku bintu abi to. Kadi, mwaneetu, kwikala mwena Kilisto, mbwena kwamba ne kuvwijibwa mukumbanangane ne cimfwanyi cya Kilisto. Tudi baswe kwikala bimfwanyi bìdì ne mwoyi; kî nkwambula kwa cimfwanyi kampanda to, kadi kwikala cimfwanyi cya Mukalenge Yesu.

¹⁰⁷ Kudi kaamusambu kakese kândi njinga bwa nunkwacisheku bwa kukimba mpindyewu mene. Ncyèna mumanye to. Ncyèna mwa kukimba to, kadi ndi mutwishiiabwe ne nwênù bônso nudi mwa kukimba. Nkwacishaayiku. *Kwikala Bu Yesù.* Mbanganyi bakaadiku bakûmvwè? [Disangisha didi dyamba ne: “Amen.”—Muf.] Ndi mumanye ne twètù bônso tudi baswe kwikala mushindu awu, pa nanku tuMwimbilaayaaku kòkò aku.

¹⁰⁸ Ndi mumanye ne Nyuma Mwîmpè munene awu udi kaaba aka. Kwênàku mufwanyine kusokoma nansha. Davidi wakamba ne: “Nansha bu mèmè mwa kwenzela bulaalu bwanyi mu iferno, kadi Yèyè neikalèmu.” Nenu Yèyè neikalè myaba yônso. Pa nanku, Yèyè udi mwab’ewu mene, diloolo edi. Yèyè mmumanye dinyungakana dyônso, cyenzedi cyônso, cintu ne cintu cyônso citudi twenza, ditangila dyônso, meeji ônsò. Yèyè mmumanye byônso abi. Kanwenaayiku nwitabuja aci anyi? [Disangisha didi dyamba ne: “Amen.”—Muf.]

Pa nanku kwikala bu Yesu, kwikala bu Yesu,
Pa buloba ndi njinga bwa kwikala bu Yèyè;
Mu lwendu lwônso lwa panwapa kuumukila pa
buloba too ne ku Butumbi
Ndi anu ndomba bwa kwikala bu Yèyè.

¹⁰⁹ Kanwenaayiku banange aci anyi? [Disangisha didi dyamba ne: “Amen.”—Muf.] Teelejaayaaku eci mpindyewu:

Mu cidiilu cya mu Beetelema mwakapatuka
Mwenyi kampanda,
Pa buloba ndi njinga bwa kwikala bu Yèyè;
Mu lwendu lwônso lwa panwapa kuumukila pa
buloba too ne ku Butumbi
Ndi anu ndomba bwa kwikala bu Yèyè.

¹¹⁰ Nudi bamanyeku ne cidi cimpinganà mu meeji patudi twakulangana apa ncinganyi anyi? Makeelela awu, mvwa

mwambule mukanda wa mfranga yitù mibwele ne yitù mipatuke mu ekeleeziya. Útu... Ncitu mwanjì kuwùmòna to. Ee, bwa kwamba menemene, ki wanyi paanyi musangu wa nzànzànzà wa mèmè kutapamu disù. Bivwa bikengela bwa mèmè kukwata naawu mudimu pàvwà ekeleeziya ucifuminaku ku dyenjiibwa apu. Nenku muvwa dinà dya Mwaneetu Seward muntwamu, ne muvwa Mwaneetu George DeArk, ne Mwaneetu Weber, mènà ònsò awu muntwamu nanku. Mèmè kumona lwà kwinsi aku, tulaasa tukese twa cilongelu cya Dyalumingu. Mèmè kumona ne búngì busanga bwa mfranga yetu ya milambu, ya tulaasa tutaanu, yivwa ya ndola umwe ne meeyà makumi asambombo, bwa tabernacle ewu, ya bantu nkama bàvwà basòmbe kaaba aka abu; ndola umwe ne meeyà makumi asambombo. Nwamonu anyi? Pashiishe mèmè kutangila ku mukanda wa cibucilu bwa leelu ewu. Mèmè kudyambidila ne: “Bantu biine búngibù bàkaadi baye’s we!” Mèmè kumonamu Mwaneetu Frank Broy, maawu wa yaaya maawu. Yèyè awu’s ki tatwányi-mwenu. Mèmè kumona beena kale bònsò abu, Mandamu Weber. Beena kale bònsò abu, bònsò abu bakaadi babànde cibàndilu aci, baye ku Nzubu wa kuulu. Bònsò bakaadi baye. Ndi mvuluka patuvwa ne ciibidilu cya kwimana kaaba aka. Ki mèmè kudyambidila ne: “Mukalenge Nzambi, ekeleeziya wetu ukaadi umwekaku mwìmpè ndambu, ne tudi batekemene ne netwibake mukwabo, kadi, Mukalenge, Wèwè udiku mutunange kupita mÚvwà mutunange musangu awu amu anyi?” To, ncyèna ngeela meejì ne Yèyè mmutunange kupita apu to.

¹¹¹ Patuvwa ne ciibidilu cya kwimana twimba ne: “Ndi njinga anu bwa kwikala bu Yèyè, mu lwendu lwanyi lwònsò lwa panwapa.” Ndi mwa kumona mukulumpe George ne nshingu wa muteelu wende mukangula mushindu *ewu*, ne bisuululu biikàle bimupweka pambidi, mwikàle ukupa mushwala wende mupayika mu minu yende. Ndi mwa kumona mpala minsantu minanga ayi, ya kale ya musangu awu ayi, badila myadi, ne byanza byabo byela muulu.

¹¹² Bayiishi bawba babwela mu citanda amu bamba ne: “È, mulumyana! Mmunyi mùdì ufika ku difikisha bantu mu díyì dimwe mushindu awu?”

¹¹³ Mèmè kwamba ne: “Ncyèna mèmè ne cya dyenzamu to. Bòbò bakaavwa bafwìmbiibwe ne bakùdimùnyìibwe mu cimfwanyi cya Nzambi, pa cibasa cya kale cya musenga wa mabaya, mu mwaba kampanda kuntu kwaka, kudibo bapetele Kilisto munda mwa myoyi yabo.”

¹¹⁴ Mmupuuya kaayi wa dipembu dilenga’s we, masambila awu, pavwawu àbànda, ku musangu ne ku musangu, bufuku bujima. Tuvwa mwa kubwela musangu kampanda, ewu uya kumbelu kwa mukwende, kadi twalukila mu mèètù pa kabundubundu; tusambila bufuku bujima. Katucyena tusangana kabidi ndondo awu to. Mbimweke anu bu ne ùkaadi muyè yònsò. Bwalu budi

cinyi? Bwalu budi cinyi? Twalukilaayi ku dinanga dituvwa naadi dya ku ntwadijilu adi.

 Nenku kwikala anu bu Yesu, kwikala bu Yesu,
 Pa buloba ndi njinga bwa kwikala bu Yêyè;
 Mu lwendu lwônsò lwa panwapa kuumukila pa
 buloba too ne ku Butumbi
 Ndi ndomba anu bwa kwikala bu Yêyè.

 Ki munudi baswe cya bushuwa anyi? Tùwĩmbàayi ne byanza byenu byela muulu.

 Kwikala anu bu Yesu, kwikala bu Yesu,

115 Bavwijiibwe bakumbanangane ne cimfwanyi Cyende!

 Pa . . . (Nanganganaayi muntu ne
 mukwende.) . . . kwikala bu . . .

 Tudi bidimba bya Mubidi Wende. Tudi ne cya kwikala bu Yêyè.

 Mu lwendu lwônsò lwa panwapa kuumukila pa
 buloba too ne ku Butumbi
 Ndi ndomba anu bwa kwikala bu Yêyè.

116 Ncya bushuwa ne nudi nucyamba nwambilamu anyi? Ambaayi ne: “Amen.” [Disangisha didi dyamba ne: “Amen.”—Muf.] Mpindyewu awu kî nnyuma wa kalolo anyi? Mbipiciibwe ne mêmè mwikàle ne Aci pamutu paa nî ncinyi nî ncinyi cyônsò cîndiku mumanye pa buloba. Ndi . . . Udi mwa kwangata wêwè bikwabo byônsò bya pa buloba, ne bìdi bituutà ku mèsù bya pópò abi, mamanya enu ônsò a mu mitu awu, ba-docteurs beenu bônsò abu, baalaabi, beepiskopo, baataatù bansantu. Mpèeshè mêmè Yesu. Ncya bushuwa. Undekele mêmè mmwangate Yêyè, mushindu wa cyena kale awu. Ndi mMuumvwa munda mwa mwoyi wanyi mwamwa menemene, mwikàle ntangila nsòmbelu wanyi, ne mmona ne majinga aanyi ngaa kuMukwacila mudimu, mudipwekeshe, ne kalolo ne wa mmwenekelu mupwekele. Ki cidi citukengela ncyôci aci, balunda baanyi. Cidi nci- . . . Ki Yesu n’Yêyè awu. Ki Yesu wa mu Bible n’Yêyè awu. Kî n’Yesu wa mamanya a mu mutu to, kadi Yesu wa mu musuuka. Yêyè awu udi kaaba aka, diloolo edi.

117 Mbanganyi bàdì bàsaamà ne mu lukengelu lwa bintu? Elaayi byanza byenu muulu, bàdì dijinga ne Kilisto. Nwênù bàdì bàsaamà biikàle ne dijinga dya kunusambidilabo? Elaayi byanza byenu muulu, muulu menemene, bwa mmone ne nudi banganyi.

118 Ee, mbanganyi bàdì ne dijinga munda mwa mwoyi wabo, bwa kusambidilaku mukwabo muntu udi usaama? Tumonaayibi byanza byenu byela muulu. Eyo. Badiku bavùmvùke.

 Mbanganyi bàdì biitabuuja ne Yesu uci di anu umwèumwè awu?

119 Katwena baabanyinangane twarta twa disambila to. Ncyèna...Kakwena twarta twa disambila to, s'mmwòmò's? Ncyèna ngeela meeji ne bôbò biine bavwapu to.

120 Nudiku nwitabuuja ne Yesu Musungidi wetu udi mwa kulwa, diloolo edi, kutudi anyi? Nenku patudi twimba, ne mêmè ngaakula bwa dileeja dya cimfwanyi Cyende, civwaYe mufwanyine kwenza ncinyi bu ne Yèyè nguvwa mwimane kaaba aka? Nudiku nwela meeji ne Yèyè mmufwanyine kwenza mwakenzaYe mu Yone 4, mwakamonaYe mukaji ku ciina cya mâyì, ne kumwambila, kumanya civwà mu mwoyi wende, ne kumuumvwijaji, ne kumwambilaci anyi? Ne mukaji awu wakamanya ne Yèyè nguvwa Maasiya awu. Nudi nwitabuuja nanku anyi? [Disangisha didi dyamba ne: "Amen."—Muf.] Nudi nwitabuuja ne Yesu umwèumwè udi—udi Mwakwidi Munene awu... [Katupa kaa mukaba wa mèyì munda mutupu.]... cyanza cya Nzambi. Nudi nwitabuuja Yesu umwèumwè awu, diloolo edi, uvwa wenda wendakana dituku kampanda... .

121 Nenku kakuvwa mulongo wa babeedi nansha umwe to, kadi kuvwa mukaji mukese kampanda uvwa ne disaamà dya mashi alwa munda awu. Wàkadìfinda mu musùmbà wa bantu awu too ne mwakayaye kalenga civwalu Cyende, kwalukilaye e kusòmba. Nenku Yesu kukudimuka e kwamba ne: "WàNdengi awu nganyi?" Nudiku nwitabuuja ne Yesu uci di anu Yesu umwèumwè awu lelu ewu anyi? Ne dijinga dya mukaji awu, munda mwa mwoyi wende's! Nwamonu's, yèyè wakakwacika bwôwà. Wàkaalukila ne wàkasòmba. Wàkindila. Ki Yesu kwamba ne: "WàNdengi awu nganyi?"

122 Nenku ki—ki...Peetelo, mupostolo awu, ki yèyè kuMutandisha, wamba ne: "Mukalenge, mona's, bantu bônso's nyewu badi munkaci mwa kuKulenga!"

123 Yèyè kwamba ne: "Eyowa. Kadi edi divwa ndilenga dishiilangane. Bukole mbupatuke munda Mwanyi. Mêmè—Mêmè ngäcyümù." Ki kukenzakanaYe eku ne eku, munkaci mwa bateeleji amu, too ne paakamonaYe mukaji mukese awu. Ki kumwambilaYe ne ùvwa ne disaamà dya mashi alwa munda kadi diitabuuja dyende dyakamusangaja.

124 Ki Yesu mwine awu anyi? [Disangisha didi dyamba ne: "Amen."—Muf.] Tudiku...Tudiku bafwanyine kudipwekesha, diloolo edi, ne kulwa bashintuludiibwe ku divwija dya nyuma wetu mupyamupya, ku Nyuma Mwîmpè, mu mushindu wa bafwanyine kulekelela mishiku yetu, mèsù etu, ne diitabuuja dyebe, ne diitabuuja dyanyi, bwa kumonaYe mwa kumweneka munkaci mwa bateeleji emu ne kubwela munda mwebe, ne kubwela munda mwanyi, bwa kuuja Dìyì Dyende, dya ne Yèyè m'Mwakwidi Munene wa ditonda dyetu anyi? Yèyè mmusòmba ku diboko dyabalume dya Nzambi, bwa kwenza dyakwilangana bilondeshile ditonda dyetu. Yèyè udi kabidi Mwakwidi Munene

udi mwa kulengiibwa mushindu anu umweumwe uvwaYe ulengiibwa pavwaYe panu pa buloba awu, ku dyumvwa dya mateketa etu. Nudi nwitabuujja nanku anyi? ["Amen."] Yesu umwèumwè awu.

¹²⁵ Mbanganyi mwab'ewu bàdì ne dijinga dyabo bôbò biine anyi dya mukwabo muntu kampanda, bamwe baa kunudi bândi mêmè nciyi mumanye to, muntu kampanda ûdì wêwè mumanye kadi ûndì mêmè nciyi mumanyine aci to? Mêmè nêncyâmbè mushindu awu. Ncyêna mumanye cintu nansha cimwe pa bìdì bikutangila anyi dilomba dyebe to. Kadi wêwè udi witabuujja ne Yesu udi apa bwa kukumbanangana ne Yêyè mwine, bwa kuDivwija mumweneke kutudi, bwa kwenza munda mwetu mu mushindu umweumwe wakenzaYe pavwaYe munda mwa Yesu Kilisto apu. Nudi nwitabuujja nanku anyi? Elaayi byanza byenu muulu, yônsò wa kunudi udi mumanye mpindyewu ne ncyêna mumumanye awu. Nwamonu anyi? Ncyêna munumanye to.

¹²⁶ Ee, twânjààyi kumona tûng. Mpenyi patudi mwa kudifidila, bwa musangu wa kumpala? Mpindyewu ikalaayi ne kaneemu. Bu Yêyè mwa kwenza cyôci eci, nudi mwa kuMwitabuujja, ne mwoyi wenu wônsò anyi? [Disangisha didi dyamba ne: "Amen."—Muf.] Nwamonu anyi? Mêmè ndi ndyumvwa anu... Nkaavwa muswe kunubiikila bwa nwênù kubànda kuneeku bwa mêmè kunutentekela byanza. Ncyêna ngiitabuujja ne ki cîngènà to. Mêmè ndi ngiitabuujja ne Yesu udi kaaba aka.

¹²⁷ Twêtù, kî mbwa kwikala—kî mbwa kwikala twenda bambule cimfwanyi Cyende to, kadi kwikala cimfwanyi Cyende. Ki Yesu utudi twêtù tubeba n'Yêyè awu. Kî mmwômò anyi? Kwikala cimfwanyi! Eyo.

¹²⁸ Mpindyewu, Mukalenge Nzambi, cishimbi-dîyi ncyôci aci. Kadi Wêwè, Mukalenge, ng'Wâkenza mulayi. Mpindyewu butudi twêtù naabu mbwa kukolesha kuya batangila anu kumpala. Mpindyewu cintu kampanda cidi ne cya kwenjiibwa, nansha mudibi ne twêtù katwena nansha dingumba emu. Twêtù tudi anu musumbà mukese wa bantu, badipwekeshe, bapele baa bisota, mu mushindu wa ne, bààbûngì baa kutudi mbafwanyine kwipaciibwa mu ekeleeziya ya minene, ya mamanya a mu mitu ayi. Bu twêtù mwa kuyamu, katwenaku bafwanyine kuvwala mudibo bôbò bavwale amu to. Ne pashiishe, cikwabo cintu, bu twêtù mwa kujuuka, Nyuma mwikàle mubeneshe ne twêtù bafwanyine kwamba ne, "Amen," mùdì Mifundu yamba amu, s'mbafwanyine kutwipata, dyakamwe. Ne bààbûngì kî mbafwanyineku kwitabiibwamu to: bamwe baa kudibo, anu bwa diikala dya dikoba dyabo; bamwe baa kudibo, bwa twitabaayi wabo; bamwe baa kudibo, bwalu mbaKunange bamba kufwa. Ne badi—badi ne Nyuma. Mbafwe ku maalu a pa buloba, ne balediibwe cyakabidi. Kadi badi ne Mwoyi mupyamupya, Mwoyi wa busadidi.

129 Kadi tudi basangile mwab'ewu, Mukalenge, mwinshi mwa musaka mukese wùdi Wèwè mutupeeshe ewu, utudi twanyisha ewu. Mpindyewu, Mukalenge, enzaku bwa bimanyiibwe ne Wèwè udi Kilisto, umwèumwè awu, ne Yèyè munene utudi twamba ewu, Ùdi kaaba aka mpindyewu bwa kumanyisha ne kwenza anu mwakenzaYe pavwaYe panu pa buloba apa amu. Enzaku nanku, Taatù, bwa bamone ne biitabuuje. Bwalu ndi ndomba nunku mu Dìnà dya Yesu. Amen.

130 Nudiku nwitabuuja ne, cinudi nulomba aci, nudi nucipeta anyi? Diitabuuja ncinyi? Diitabuuja mbulelela. Diitabuuja ncintu cyùdi mumanye ne mutwishibwe bwa bwalu bwaci. Diitabuuja kî ncintu cyùdi ubuka mu meeji to. Diitabuuja ncintu cyùdi mumanye, nwamonu's, cintu kampanda cidi cipweka munda mwa musuuka webe.

131 Ndi njinga ne aba bàdì kabayi bammanye abu, ne mèmè nciyi munumanye to, kadi peebe mucikàle anu ne dilomba anyi dijinga, swayi nwèlè cyakabidi byanza byenu muulu. Ndi muswe bwa kupetaku anu cingenyinyenyi cya—cya mu byònsò naka, muntu yònsò muneemu emu ùndì nciyi mumanye awu. Eyo. Mmu myaba anu yònsò. Ncitu muswe kwakula ne bantu bândi mumanye to, bwalu bamwe mbafwanyine kwamba ne: “Yèyè's mmubamanye.” Kadi nkujuuke byanza byàbùngì, bya bândi nciyi mumanye to. Mpindyewu, bu Mukalenge Yesu mwa kufila ciine eci, bakwabo baa kunudi nebiitabuuje ne mwoyi wabo wònsò, ne nenwitabe dyondopa dyenu ne cyònsò cidi cifwanyine kwikalaku aci anyi? [Disangisha didi dyamba ne: “Amen.”—Muf.]

132 Bu nwènù mwa kuswa, twànjàayi—twànjàayi anu, munda mwa myoyi yetu, kusambila ne: “Yesu umusheku mpatà yònsò.” Mona's, Yesu kèna mwa kwelaku mpatà to. Pìikalàbi ne twètù tuvwa mu cimfwanyi Cyende, s'tudi twitabuuja. Yèyè uvwa mwitabuuje Nzambi. Wàkalwa bwa kwenza diswa dya Nzambi. Kavwa Yèyè ucyuka bivwa bantu bamba, anyi cìvwà nî nganyi nî nganyi wamba to. Yèyè wakalwa bwa kwenza cintu anu cimwepele eci: kwikala musadidi wa Tatw'Èndè. Ne Tatw'Èndè awu uvwa musòmbèle munda Mwende. Twètù tudi balwe bwa kwikala musadidi wa Nzambi. Nyuma Mwîmpè mmusòmbèle munda mwetu. Tudi baswe kuMukwacila mudimu.

133 Nèngìikalè mwa kubumbakajila meeji pa muntu mukaji kampanda, mukaji wa—wa bafiike udi musòmbè lwà paanyima apa ewu. Ngeela meeji ne yèyè uvwa mwele byanza muulu, bwa ne ncyèna mumumanye to. Bu mudibi ne—ne. . . Ee, badi babidi mwaba wawa. Eyo. Nansha umwe wa ku nwènù bainàbànzà abu kî mmummanye to, anyi mèmè ncyèna munumanye? Cyòci ciikàle cya bushuwa, elaayi byanza byenu muulu, bwa ne mèmè ncyèna munumanye to. Elaayi byanza byenu muulu. Eyo. Eyo. Katwena bamanyangane to. Mu Mifundu, bavwaku baakule

bwa . . . Kabingila kàdi kenze ne mmone, nudi . . . Nuvwa bantu bafiike. Nwamonu anyi?

¹³⁴ Kuvwa muntu mukaji, musangu kampanda, mu Bible emu, nshapita mwi4 wa Yone Munsantu. Yesu wakalwa ku ciina cya màyi aku, ne kuvwa muntu mukaji wa beena Samaaleya. Úvwa mukaji wa—wa cisa cishiilangane. Ki Yesu kwakulaye nende, mu tusunsa anu tukese cyanaana, mu mushindu wa ne Wàkajandula ne lutatu lwende luvwa ndwa cinyi, ne kumwambilaye civwà lutatu lwende. Nenku paakamwambilaYe civwà lutatu lwende, mukaji awu wakamba ne: “Mukalenge, ndi njingulula ne Wêwè ewu udi Muprofeta. Mpindyewu, twètù tudi bamanye ne, paalwa Maasiya, Yêyè ngwatwambila maalu aa.” Kadi bôbò kabavwa bumvwe ne Yêyè awu uvwa nganyi to. “Mona’s,” mwàkaMwambilà mukaji awu, “Wêwè udi nganyi?”

Ki Yesu ne: “Mêmè ki Yêyè awu, udi wakula neebe ewu.”

¹³⁵ Kwalukilaye e kubwelaye mu cimenga, muvwaye mufumine amu, kwambaye ne: “Lwâyì, kanumonaayi Muntu Udi mungambile bintu bìndi mwenze, mungambile bìdi bibi. Wawa kî m’Maasiya mwine awu anyi?”

¹³⁶ Nwênù bakaji aba kacya nukaadiku babale ciine aci anyi? Bushuwa’s. Yone Munsantu, nshapita mwi4. Ee, piikalàbi ne . . . Yesu udi umwèumwè awu makeelela, leelu, too ne kashidi. Ne nwênù peenu biimane mu ntanta wa mètres dikumi ne mwandamukulu ne mwaba wúndi ewu, anyi, basòmbe’s we. Nudi nwitabuuja ne Yesu umwèumwè awu, udi wakula pankaci peetu ewu, mmufwanyine kumbuulwila cinudi nujinga, wakwila kúndi eku anyi? Piikalàbi ne ndi munwàmbile Bulelela, Bible ewu mwikàle wamba cya bushuwa, Yêyè’s udi mwa kucyenza, kî mmwômò anyi? Yêyè mucyènzè, nenùcitàbùùjè anyi?

¹³⁷ Mukaji udi ku ndekeelu wawa, udi muntangile awu, mushindu *ewu*, ùdi ùsaama disaamà dya nyima didiye ukeba kwondopiibwa. Ncya bushuwa menemene. Piikalàci cya bushuwa, ela cyanza cyebe muulu, inàbànzà udi ku ndekeelu wawa. S’ki bwalu mbwòbù abu.

¹³⁸ Kadi mpindyewu bishi wêwè, inàbànzà? Wêwè peebe, udi witabuuja anyi? Ngeela meeji ne wêwè peebe, udi mwambe ne udi mwenyi kúndi, wêwè udi ku luseke kwende awu. Udi ne lutatu ne mutu webe. Kabidi, udi ne disaamà dya dikoba. Piikalàci cya bushuwa, ela cyanza cyebe muulu.

¹³⁹ Mpindyewu, alukilaayaaku kwenu kumbelu. Nwênù bônso babidi nudi mwa kusangala. Diitabuuja dyènù dyanondopu.

¹⁴⁰ Nudi nwitabuuja ne Yesu udi kaaba aka, diloolo edi anyi? [Disangisha didi dyamba ne: “Amen.”—Muf.] Kadi bishi bamwe baa kunudi, nwênù bakwabo bônso bàdi mu citanda emu aba? Myaba mikwabo yónsò, itabuujaayi.

¹⁴¹ Muntu mukaji nyêyè ewu musòmbe mwab'ewu, ùsambila. Mmulwanganyi wa mvita. Ndi mumumanye, kadi ncyèna ne cîndî mwa kwenza to bwalu Bukênkè abu mbulebelele pamutu pende. M'Mandemwazele Bruce. Mpindyewu, Mandemwazele Bruce, ncyèna mumanye kantu nansha kamwe pa cidî cikutacisha to. Wêwè ewu, wâkondopiibwa ku kansere, musangu kampanda. Kadi anu lwà ku ciibi kwaka, musangu anu wa nzànzànzà wûngààkapàànà . . . wûngààkakwambilà . . . wûngààkakumònà mwimane mu mushiku wa mbelu amu, Nyuma Mwîmpè kungambila cintu kampanda cìvwà muntu nansha umwe kayi mumanye to pa kuumusha wêwè ne ngangabuka. Ncya bushuwa. Kî mmwômò anyi? Udi witabuujja ne Yêyè udi mwa kungambila cidî cikutacishà mpindyewu anyi? Ndi mukumanye, kadi ncyèna—ncyèna mumanye cidî cikutacisha to. Ncyèna ne cingenyinyenyi nansha cikese to. Bwalu, udi mwondopiibwe ku kansere. Kadi ncyènakù mwa kukanda bwa mùdî Bukênkè abu bulebelele kumutu kwebe to. Wamonu anyi? M'Bwôbò abu kacya bwashaala anu mwab'awu mene.

¹⁴² Mpindyewu, nyewu mmona muntu kampanda mukwabo ujuuka. Kî mbwebe wêwè to. Mbwa muntu kampanda udi ne kansere. Ncya bushuwa menemene. Ne pashiishe nyewu mmona muntu mukaji kampanda, anyi cintu kampanda. Yêyè awu nngènzàmpèkààtù, anyi cintu kampanda, mwikàle ne ciibidilu cya kunwa maala, anyi cintu kampanda. Ne wêwè udi mwambule mishwala yibidi ku byanza, bwa mèmè kuyitentekela byanza, bwa disungidiibwa dyende—dyende. Aci cidî EMU MMUDI MUKALENGÈ WAMBA. Ncya bushuwa menemene. Bwa mpindyewu kaayi wêwè wikalè nzuji. Ncya bushuwa anyi? Nî ncyà bushuwa, ela cyanza cyebe muulu.

¹⁴³ Muntu kampanda paanyima muneemu *emu*, ûndî nciyi mumanye to, ela cyanza cyebe muulu, muntu kampanda ûndî nciyi mumanye. Mwab'ewu, kudi . . . Nciyi aci? Ela cyakabidi byanza byebe muulu, mwab'awu mene lwà mu ditumba amu. Mudi bantu bakaji banaayi anyi bataanu basòmbemù. Nudi nwitabuujja ne mèmè ndi musadidi Wende anyi? Nudi nwitabuujja ne binudi numona ebi mbyenjiibwe kudi Nyuma wa Nzambi anyi? Nudi nwitabuujja anyi? Bu wêwè mwa kwitabuujja.

¹⁴⁴ Muntu mukaji udi musòmbe wawa, muntangile, muvwale kafulu kakese, mwase binete, ne tudibu twa ku maci tumweka bu tutooke. Eyowa. Kî mbwebe wêwè mwine to. Mbwa mukwabo muntu, ne yêyè awu udi mu ngiikadilu mubi be. Mmashi miikàle atunkumikila munda. Yêyè awu udi mu lupitaadi. Lupitaadi alu ludi mu New Albany. Aci mbulelela. EMU MMUDI NYUMA MWÎMPÈ WAMBA.

¹⁴⁵ Nsongaakaji ewu, uvwa mwele cyanza cyebe muulu anyi? Muntu mukaji ewu, ku lukwabo luseku *elu*, udi muntangile mushindu ewu ewu, udi ungiitabuujja anyi? Wêwè udi ne dijinga

pa mwoyi webe. Udi witabuuja ne Nzambi mmufwanyine kumbuulwiladi anyi? Eyo. Wêwè peebe, udi usambidila muntu mukwabo. Mmuntu kampanda udi ne nsòngà mu mèsù. Yêyè awu udi ne bwôwà bwa ne nkwèpì kwavwaye kushaala mpofo. Aci ncilelela. Mpindyewu, wêwè mwa kwitabuuja pa kaaba kende, kaakushaala mpofo to bu wêwè mwa kuciitabuuja.

¹⁴⁶ Muntu mukaji udi buludi lwà paanyima pààpa wawa, lwà mundekeelu mwamwa, paanyima paa muntu mukaji wedi cyanza muulu wawa. Wêwè udi ne dísàamà dya mutu unyunguluka. Ncya bushuwa. Dinyunguluka dya mutu adi didi dikwenzekela pa muminu. Ncya bushuwa. Kí mmwòmò anyi? Nanku elaayi byanza byenu muulu pìikalàbí ne maalu awu mmudiwu. Nwênù bantu bakaji baba, mmbândì ngambila. Eyo.

¹⁴⁷ Muntu mukaji uvwa ulonda awu ngwèpì mwaba awu? Uvwa mwele cyanza cyebe muulu, wêwè peebe anyi, mwaneetu wa bakaji, mwaba awu? Ela cyanza cyebe muulu, wêwè muntu mushindame wawa. . . Eyo. Udi ne binyoka byùdì ujinga bwa kukusambidilabo. Ncya bushuwa. Kí mmwòmò anyi? Ela cyanza cyebe muulu. Udi witabuuja anyi?

¹⁴⁸ Muntu kampanda—muntu kampanda lwà mundekeelu mwa ekeleeziya mwamwa, itabuuja, ikala ne diitabuuja.

¹⁴⁹ Ndi mmona muntu mukaji muntangile buludi, mutangijile mèsù pankaci paa bantu bakaji babidi mwab'ewu mene. Mmuteeke munu ku mishiku. Mwindile dimupanda, dya kalaalaala. Aci ncya bushuwa menemene. Pìikalàcì cya bushuwa, ela cyanza muulu, inábànzà. S'nyêyè wawa.

¹⁵⁰ Nudi nwitabuuja anyi? [Disangisha didi dyamba ne: "Amen."—Muf.] Ncinyi aci? N'Yesu Kilisto, Mwànà wa Nzambi. Nudi nwitabuuja ne mwoyi wenu wònsò anyi? ["Amen."]

Mpindyewu, katanci kakese cyanaana, mwaneetu wa bakaji.

Kwikala bu Yesu, kwikala bu Yesu,
Pa buloba ndi njinga bwa kwikala bu Yêyè;
Mu lwendu lwònsò lwa panwapa kuumukila pa
buloba too ne ku Butumbi
Ndi ndomba anu bwa kwikala bu Yêyè.

¹⁵¹ Mpindyewu nudi numona ngiikadilu wa lufu wa ekeleeziya wa dituku edi ewu. Civwa cifwanyine kwikala cyenzeke mu matuku a Mukalenge Yesu ncinganyi, pààkenzekà cyòcì eci? Mukaji awu, mutupike ne disanka, wakiimansha mulondo wende wa màyi awu, ne wakabwela mu cimenga. Yêyè kwamba ne: "Maasiya udi apa!" Kadi, leelu ewu, eyowa's, kanwena bapete bukooya búngì bukumbane to, ku binù ku cyoshelu aku, bwa kwanji kupeta Dilediibwa dya cyakabidi to. Kudi cintu cipampalamuke mwaba kampanda. Aci's ncifwanyine kutuma Nyuma Mwímpè mwaba wònsò ewu, mufwanyine kajuula ditabuluja, dileeja dya Yesu Kilisto, cimfwanyi Cyende civwijiibwe cikumbanangane mwab'ewu, mwikàle watwa eku

watwa eku munkaci mwa bantu, bwa kwenza cyôci aci. Ncilumbu kaayi ciine eci's? Nkupangike cintu kampanda. Bidi bitukengela ditabuluja.

¹⁵² Mbanganyi bakwabo bàdi bàsaamà? Elaayi byanza byenu muulu, aba bàdi bàsaamà ne mu lukengelu lwa bintu.

¹⁵³ Tentekelanganaayi byanza muntu ne mukwende. Tusambilaayi. Lukasalukasa mpindyewu, tentekelanganaayi byanza muntu ne mukwende, ikalaayi badilongolole bwa kwakidila dyondopa dyenu. Wèwè mwitabuuje ne mwoyi webe wònsò, udi mwa kwondopiibwa anu patudi twakulangana apa.

¹⁵⁴ Mémè's ngàkèmi. Tuvwa twakula bwa muntu mukaji kampanda, bwa dilediibwa kampanda. Kacyakacya, kacya bandela, nцитuku mwanji kupeta muntu mukaji nansha umwe, ku dyanyi paanyi dimanya, ukààdikù mulwe pa cibumba cya ku cyambilu, mwikàle ujinga mwànà. . . Ncinyi cidi cyènzekà? Pàmwà mwa kumumona, ne mmona cyôci aci cyènzeka, dijinga dyende dya menemene adi bwa cintu cijaalame aci, mvwa mwa kumwambila ne: "Inàbànzà, udi ukeba mwànà."

Yèyè ne: "Eyowa's, Mwaneetu Branham."

¹⁵⁵ Ndi mumanyeku bwalu bwa muntu mukaji kampanda, wa bidimu makumi anaayi ne citeema, mmulele mwànà mukese wa balume patudi twakulangana apa. Matuku ende ónsò a mwoyi, ùvwa musòmbe ne mulume ewu kacya, ee, kacya pacivwaye ne bidimu bu dikumi ne bisambombo nanku awu. Úkaadi ne bidimu makumi anaayi ne citeema, ne mulume udi ne bidimu makumi ataanu ne bya mu njila. Dyakamwe mémè kwamba ne: "EMU MMUDI MUKALENGE WAMBA. Ncya bushuwa, neulele mwànà awu." Kwalukilaye mwende e kusùmbayè tulamba twa mwànà awu. Paanyina paa bidimu bisatu, pakaawaye ne bidimu makumi ataanu ne bibidi, kulelaye mwànà mukese wa balume uvwaye mujingejinge bwa kupeta awu. Bwa cinyi? Pàakacyùmvwàye cyambiibwa, yèyè wakamanya ne civwa ne cya kwenzeka. Cyakenza cinganyi? Cyakamuteeka mu lwidi lujaalame. Bu ne. . . Nyuma Mwîmpè mmwîmpè wa dikema bwa kulwa kwambila bantu bintu ebi. Bu byôbi mwa. . . Wèwè mubwele mu lwidi lujaalame mpindyewu, bwa dyondopiibwa bwajiki.

¹⁵⁶ Éyi Mukalenge, Wèwè ngudi Nzambi, ne Wèwè ngudi Nzambi kashidi ne kashidi. Ne twètù tudi—twètù tudi ne disanka dîngì dya kumanya ne Wèwè ngwàkalaya ne Newikalè ne bàshààdilè paWalwa pa buloba. Cyaswa kwenzeka cyenzeke, nekwikalè anu cisàmbà cìikalà cidilongolole. Tudi bamanye ne kudi cyadiikumi cidi muntu upeesha Nzambi. Ne kudi cyadiikumi munkaci mwa bantu. Pàmwàpa, misangu mikwabo tudi bafwanyine kwamba ne, cya dikumi cimwe, cya dinowa dya buloba bujima dya munda mwa bikondo, ki cìikalà Basungula bàdi babiikidiibwe abu.

157 Éyì Taatù, tudi tulomba, patudi tutata ne mudimu mukole kaaba aka apa, twètù bõnsò cyapamwe, twenda tukebulula mu cimenga, tuditacisha bwa kubwejamu bangenzàmpèkààtù, tuteeta bwa kwenza cintu kampanda bwa Bukalenge bwa Nzambi. Tudi tuya mu cimenga, tutangila dibenga kucyuka dya myanda. Tudi tudimona. Ne bu Lota, mu Sodoma, bidi bitacisha misuuka yetu ku dituku ne ku dituku, bwa kumona bantu bakaji banwa mfwanka kadi—kadi balaka mukana bamba mudibo beena Kilisto, ne banwa maala, ne bapicisha dîbà mu bisankasanka, ne bavwala bilàmbà bya bisalulangana masandi. Ne—ne balume baalakana. Ne, kaa, mpekaatu wa Sodoma's we! Myoyi yetu's mmibungame munda mwetu, Mukalenge.

158 Kaa, kî mbya bikemesha to pàdì diitabuuja dilwe kupweka kwinshi kutambe, pàdì bantu biikàle mushindu awu apu, bapangile kwikala ne Mashi a Yesu. Ôwò awu's ngavwa mafwanyine kujidila misuuka yabo ne kuyilakwisha ne kapyia bwa Nzambi, kadi bôbò nyawu kabayiku mwa kucyakidila to. Ne tuubitanda tukese mu mansanga a njila, twa dituuta dya makasa ne ngoma, bidi mu mansanga abo a njila, kadi bôbò badi batuseka twètù bàdì babwejamu bansantu baa Nzambi udi ne mwoyi abu.

159 Kaa, mushindu mwine utudi tuKuwela twasakidila's, Taatù, bwa muntu kampanda mudipwekeshe, mu mwaba kampanda, wâyiisha Evanjeeliyo, wôlwela bantu cianza awu. Enzaku nanku, Mukalenge, anu mpindyewu patudi tusambila apa, ne bamanye ne Nyuma Mwimpè Webe munene ne Banjelo badi—badi mwab'ewu biimane pa myaba yabo mu ekeleeziya ewu.

Nzambi, fwaku luse bwa mpekaatu ne mpekaatu yônsò.

160 Bantu nyewu basaama mwab'ewu, diloolo edi. Badimu bààbùngì. Wèwè's wàleeji Wèwè mwine mùdì kaaba aka, Mukalenge, ku basadidi Beebe. Bààbùngì baa kudibo kwaka biikàle boolola cianza bwa kukwata ne babiikila ne bakoka. Nenku, Mukalenge, Wèwè's udi mumanye ne—ne Wèwè ngudi Umwepele Udi mufwanyine kwanyisha bwa cyôci eci kwenjiibwaci. Wèwè ngudi Nzambi, ne Nzambi nkayeebe, ne Utu ucyenza mu kiipacila mene kaa ne Wèwè ngwàkalaya ne neUcyènzè. Ne cyôci ki cimanyinu cya ndekeelu bwa ekeleeziya, muWakamba. Cikondo cya nshiikidilu cikaadiku.

161 Pashiishe Wèwè wàkeela lukonko elu ne: “Nènsanganè diitabuuja pânGààlwà pa buloba anyi?” Kacya Kwakakonkaku ne: “Nènsanganè bidimba bya ekeleeziya anyi? Nènsanganè twitabaayi anyi? Nènsanganè meeji matooke anyi?” to. Wèwè wákamba ne: “Nènsanganè diitabuuja pânGààlwà pa buloba anyi?”

162 Mukalenge, swaku bwa babeedi aba balekelele diitabuuja dyabo, bashiyangane ne dipututuka, ne mpatà, ne bwôwà. Swaku bwa diitabuuja dyabo diikalè dilekelela anu patudi

twakulangana apa. Nenku bôbò balekelele diitabuuja dyabo, disaamà nediikalè ne cya kulekelele, dyabulu nealekelele cyanza cyende, ne bôbò nebashiyyibwe badishikamine kudi Bukole bwa Nzambi wa Bukole bwônsò. Nyuma Mwîmpè apaasalale mu mwoyi ne mwoyi wônsò, abatiizeku dînà musuuka wônsò, ne ondopeku mubidi ne mubidi wônsò ùdì usanganyibwa mu Bwikadi bwa Nzambi awu. Enzaku nanku, Mukalenge.

¹⁶³ Bwa bwalu ebu ndi ndomba ne, dyabulu ashiyeku muntu yônsò udiye munkaci mwa kutacisha muneemu emu, diloolo edi. Mu Dînà dya Yesu Kilisto, Sataana, dilekelele ushiye bantu aba. Mêmè bu musadidi wa Nzambi, ndi ngeela lubila pa kaaba kaabo, mbalombela luse. Amen.

¹⁶⁴ Mbanganyi bàdì biitabuuja ne mwoyi wabo wônsò mpindyewu, ne cyônsò cìdì munda mwenu ne, Yesu Kilisto udi munkaci mwa kuDileeja pa buloba leelu ewu munkaci mwa bantu Bende? Nudi baMunange anyi? [Disangisha didi dyamba ne: “Amen.”—Muf.]

¹⁶⁵ Nenku twîmbààyi bônsò cyapamwe musambu wa kale ewu wa ne, *Ndi MuMunangè*. “Ndi muMunange bwalu Yèyè wakannanga kumpala.” Bônsò cyapamwe, patudi biimanyine kuulu apa. Bantu bônsò mpindyewu, bônsò cyapamwe. Bàdì bawumanye mbanganyi? Elaayi byanza byenu muulu. *Ndi MuMunangè*. TuMukuukwilaayi mpindyewu.

¹⁶⁶ Babeedi bônsò, beena ntatu bônsò, juukilaayaaku kuulu mpindyewu, nwakidile dyondopiibwa dyenu. Ndi ngiitabuuja, kabidi ne mwoyi wanyi wônsò. Bu nwênù anu mwa kulekelaku diitabuuja dyenu adi diya, mpindyewu mene’s we! Kilisto wa Nzambi, Yèyè udi kaaba aka awu, udi ne cya . . . CidiYe munkaci mwa kwenza ncinyi? Ûtùvwija cimfwanyi Cyende. Nwamonu anyi? Nyuma Wende mwab’ewu, mwikàle ùDileeja anu buludi kunudi.

¹⁶⁷ Mpindyewu, s’nudi bamanye ne kî mmêmè to. Mêmè ncitu mumanye bantu abu to, ní bavwa banganyi, bàvwà beele byanza byabo muulu abu. Bôbò bavwa beele byanza byabo muulu ne, kî mbamanye to. Ne mêmè paanyi kwela byanyi byanza muulu ne, ncyêna mubamanye to. Kadi Nzambi ngudi mubamanye. Ncinyi ciine aci?

¹⁶⁸ N’Kilisto awu munkaci mwa kudileeja Yèyè mwine. Bwalu mbwa diitabuuja dyebe bwa kuciitabuuja. Bwalu mbwa diitabuuja dyanyi mu mudimu kampanda wa bwambi, wùvwàYe mushindikile kudi Mwanjelo; Mwena fôtô unudi numona wawa, udibo bakudike mu bibambalu bya mazola ne mpingu bya maalu a ntendeleelu, ne mudiCi cisanganyibwa pa buloba bujima, nCimanyike ne, n’Dikunji dya Kapyà dyàkalombolà bânà baa Izaleela adi.

¹⁶⁹ PaakavwijiibwaDi mubidi, Divwa mu mmwenekelu wâkabiikilàbo ne m’Mwànà wa Nzambi awu. Yèyè kwamba

ne: “Ndi mufume ku Nzambi ne muye ku Nzambi, ngaalukila ku Nzambi.”

¹⁷⁰ Paanyima paa lufu, dijiikibwa ne dibiika Dyende dya ku lufu, Pòlò wakatuutakeena Nende, mu njila wa ku Damaseke, mu mmwenekelu wa Dikunji dya Kapya, mu Bukênkè bwine bwàkamufomijà abu. Pòlò kwambaye ne: “Wèwè udi nganyi, Mukalenge?”

¹⁷¹ Yèyè kwamba ne: “Ndi Yesu. Mbikole bwa wèwè kukandamana cyanaana.”

¹⁷² Yesu kwamba ne: “Mu katanci kakese aka, baa pa buloba,” kosmos, ndongolwelu wa maalu a pa buloba, bidimba bya ekeleeziya, ne bikwabo, “kabaakuMmona kabidi to, kadi nwènù nenuMmone. Bwalu Mémè,” mupinganyi muleeji muntu, “Mémè, Yesu umwèumwè awu, nêngiikalè neenu, munda mwenu mene, too ne kunshiikidilu kwa buloba. Ne byenzedi bindi Mémè ngenza nenùbyenzè peenu. Nenwènzè byàbùngi bipite ebi, bwalu Ndi nya kudi Taatù Wanyi.” Amen. Kaa, ekelekele!

Ndi muMunange, ndi muMunange
Bwalu Yèyè wakannanga kumpala
Ne wakampetela lupandu
Pa mucu wa Kalvariyo.

¹⁷³ Kaa, patudi tuwimba cyakabidi apa, ndi muswe bwa ba-Méthodistes, ne ba-Baptistes, ne beena Mpenta, ne ba-Nazaréens, ne ba-Pèlerins de la Sainteté, beena église de Dieu, bônso, nwènù bônso cyapamwe, ndi muswe nulabulangane ku cyanza ne muntu kampanda udi kumpala kwebe awu, ne paanyima peebe, ne ku luseke lwebe, patudi tucyenza apa mpindyewu. Bônso cyapamwe.

Ndi . . .

Nzambi akubeneshe, mwaneetu wa balume, mpaasata.

. . . muMunange
Bwalu Yèyè wakannanga kumpala
Ne wakampetela lupandu
Pa . . . Kalvariyo.

¹⁷⁴ Mpindyewu edi ndilondangana dya dibiika dya ku lufu ne: “Twètù bàdi ne mwoyi ne bashaale katwakupangisha aba bàdi bafwe to, bwalu mpungi wa Nzambi neadile ne bafwe mu Kilisto nebabiike dyambedi. Twètù bàdi ne mwoyi ne bashaale netwangaciibwe muulu pamwe naabo bônso, tutuutakeena muntu ne mukwende kumpala kwa kutuutakeena Nende. Tutuutakeena muntu ne mukwende kumpala kwa kutuutakeena Nende, twangaciibwa muulu pamwe Nende, pamwe naabo, bwa kutuutakeena ne Mukalenge mu mpeepele, bônso pamwe.”

¹⁷⁵ Mpindyewu nyewu tudi basangile muntu ne mukwende, bàlabulangana ku cyanza muntu ne mukwende, mpindyewu tuMwelaayaaku Yèyè mwoyi.

Ndi muMunange, ndi muMunange
Bwalu Yêyè wakannanga kumpala
Ne wakampetela lupandu
Pa . . . wa Kalvariyo.

Tekèshàku.

¹⁷⁶ Nsongaakaji mukwabo nyawu mumbe mupatuke mu mulongo, mulwe buludi kuneeku ne mutwe binù ku cyoshelu, ushikunkila ne udila mwadi. Kudiku mwa kwikalaku bakwabo mwab'ewu bàdi bumvwe ditwishiibwa dimwedimwe adi, bàdi baswe bwa kutwa binù pamwe nende anyi? Tudi bafwanyine kwikala ne disanka dya kukumona ulwa kuneeku wangata kaaba. Nzambi akuneneshe, mwaneetu wa balume. Muntu mukwabo udiku mwa kulwa buludi kuneeku anyi? Abi's mbîmpè.

Ndi . . . (Umfwimbeku, Mukalenge, ne ungenzeku.) Ndi . . .

Pweka ndaayi kwa Mufwimbi. Muntu mukwabo udiku mwa kulwa bwa kwangata kaaba anyi?

. . . bwalu Yêyè wakannanga kumpala
Ne wakampetela lupandu
Pa mucu wa Kalvariyo.

Kaa, Yêyè kî mmulenga wa dikema anyi? [Disangisha didi dyamba ne: "Amen."—Muf.]

¹⁷⁷ Mukalenge mubeneshiibwe, nsongaakaji ewu Wêwè ngudi mumumanye. Mémè ncyèna mumumanye to. Kadi kudi cintu kampanda cya pabwaci cidì cimulenge anu katanci kakese aka, cidì cyenze ne yêyè apatuke mu bateeleji mwamwa alwe, kabayi bamuswishisheku to. Awu uvwa ng'Wêwè, Mukalenge. Nyewu mutwe binù ku cyoshelu eku, pàdi bananga bende biikàle pabwipi, bamujìngile maboko. Badi balomba luse, ne bulombodi, ne makanda a nyuma, bwende yêyè. Byenzekeku, Mukalenge. Byakafundiibwa, mpindyewu byenzekeku, ne: "Kwakubengela aba bàdi benda lwenda lululame kumpala Kwebe cintu cimpè nansha cimwe to. Milayi Yebe yidi eyowa ne amen, bwa bônso bààKunangà ne bààKulondà abu."

¹⁷⁸ Nsongaakaji ewu amanye cyôci eci, ne ditwishiibwa dyônso, diloolo edi ne, kakwena cintu nansha cimwe mu Maulu, cidì cilayiibwe mu Dîyì dya Nzambi, cidì Nzambi kayi mutambe kwikala ne diswa dya kucipongolola mu mwoyi wende anu pa dibà edi mene to. Swaku bwa kwikalè citupa cya cisankisha menemene cidì mwa kumupeebwa, pacidiye mutwe binù mupone mikookwela ku cyoshelu apa. Swaku bwa Nyuma Mwîmpè amupe bintu bidiye ujinga munda mwa mwoyi wende abi. Enzaku nanku, Mukalenge, bwalu tudi tulomba nunku mu Dîna dya Yesu.

. . . Yèyè wakannanga kumpala
Ne wakampetela lupandu
Pa . . .

[Mwaneetu Branham udi uyiikila ne muntu—Muf.]

¹⁷⁹ Nzambi munanga, swaku bwa dijinga dya mukaji ewu dimupeebwe, bwa munanga wende udiye munange bikole ewu. Swaku bwa Nyuma Mwimpè munene awu ènzè mudimu awu, ùdi anu Yèyè mwa kwenza pa dībā edi. Nyewu tubilambula byònsò kùdi Wèwè; tudi tulomba bwa . . . Bwimpè bunangyanganyi Bwebe mbulenga kutamba too ne mwoyi. Davidi ngwákamba nanku awu. “Bwimpè bunangyanganyi Bwebe mbulenga kutamba too ne mwoyi bwanyi mêmè, mishiku yanyi neyiKutumbishe.” Mupeesheku dijinga dya mwoyi wende, Mukalenge.

¹⁸⁰ Padi ekeleziya ewu, ne mêmè, mwambi Webe ewu, ne . . . ne bambi bakwabo bàdi mu citanda emu aba, tudi tulomba ne meeji matooke ónsò bwa dilomba dyende adi. Mu Dîna dya Yesu Kilisto. Amen.

Tudi tucinana, mwaneetu wa bakaji. Akubeneshe.

¹⁸¹ Mpindyewu pàdi bantu aba munkaci mwa kudilambula apa, babumbakaja meeji abo, bôbò biine, kudi Mukalenge, pacidi Nyuma Wende munkaci mwa kutwa eku ne eku mu citanda apa, ndi njinga ne tushaalaayi mu cinyaanya bwa kasunsa kamwe cyanaana. Mpaasata udi utangila bwalu bwabo ku cyoshelu. Twètù twikalaayi mu disambila, anu bwa katanci kakese cyanaana mpindyewu. Ùdi wènda ùlwa. Nenku twikalaayi twimba misambu mpindyewu. Yèyè udi munkaci mwa kwakula ne muntu ne muntu.

¹⁸² Twinyikaayaaku mitu yetu, bwa twikalè mu disambila. [Mwaneetu Branham wabangi kwimbila *Ndi MuMunange* mu matama—Muf.]

Ne wakampetela lupandu
Pa mucu wa Kalvariyo.

Ndi muMunange, ndi muMunange
Bwalu Yèyè wakannanga kumpala
Ne wakampetela lupandu
Pa mucu wa Kalvariyo.

Ndi mwa, nêngìikalè mwa, ndi mwitabuuje;
Ndi mwa, nêngìikalè mwa, ndi mwitabuuje;
Ndi mwa, nêngìikalè mwa, ndi mwitabuuje
Ne Yesu udi unsungila mpindyewu.

Ndi mwa, nêngìikalè mwa, ndi mwitabuuje;
Ndi mwa, nêngìikalè mwa, ndi mwitabuuje;
Ndi mwa, nêngìikalè mwa, ndi mwitabuuje
Ne Yesu udi unsungila mpindyewu.

NêmMukwàcìlè ku Dìyì Dyende,
 NêmMukwàcìlè ku Dìyì Dyende.
 Yêyè udi untwadila lupandu cyanaana
 Ne mêmè nêmMukwàcìlè ku Dìyì Dyende.

Ndi mwa, nêngìikalè mwa, ndi . . .

¹⁸³ Tangila kuneeku, wêwè nsongaalume. Udi muswe lwendu lwa ndondo ne Nzambi anyi? Udi witabuuja ne Yêyè mmufwanyine kukupeeshalu anyi? [Mwaneetu wa balume awu udi wamba ne: “Eyowa.”—Muf.] Wêwè mwitabuuje ne mwoyi webe wônsò, udi mwa kulupeta. Nwamonu anyi? Udi uciitabuuja anyi? [“Eyowa’s, mukalenge. Ndi ngiitabuuja.”] Udi uciitaba anyi? [“Eyowa’s, mukalenge.”]

. . .mwitabuuje ne Yesu udi unsungila
 mpindyewu.

¹⁸⁴ Ewu yônsò udi muMunange awu, ela cyanza cyebe muulu. Amba ne: “Ndi muMunange, ne byônsò—byônsò bìdì munda mwanyi.” Yêyè kî mmulenga wa dikema anyi? Patudi twinyika mitu yetu apa, anu mu disambila dya dyoya naadi edi. . . Nwavulukaayi disangisha dya maalaba diloolo. Nêngìikalè mwa kunulomba, kudiku . . .

¹⁸⁵ Panwikala baswe mpindyewu, ne lukasa lwônsò, yônsò wa kunudi uvwa mwele cyanza cyende muulu bwa lupandu awu, bwa lwendu sheemàsheemà, itabuuja ne walupeci. Pawikalà kuyi mwa kuluumvwa to, angata mwânà mupyana. Nwamonu anyi? Tungunuka wêwè anu ne kwamba ne udi naalu too ne paalwalu mu bulelela.

¹⁸⁶ Nwênù bìtàbì dyondopiibwa abu, kadi kanuyi nuumvwa dishiilangana nansha dikese; udi wamba ne: “Dyanyi—dyanyi diitabuuja kî ndikumbane bwa kucitentemuna mpindyewu mene to, Mwaneetu Branham.”

¹⁸⁷ Angata njila wa mwânà mupyana. Tungunuka wêwè anu ne kwamba ne: “Mukalenge, mêmè ndi mwondopiibwe. Ndi ngiitabuuja nanku.” Necilwe. Necikuteeke mu cilunji cijaalame, wamonu’s, nenku dîbà adi diitabuuja dyebe nediikalè dijaalame. Nedilukwate. Tungunuka wêwè anu ne kulwitabuuja ne mwoyi webe wônsò.

¹⁸⁸ Mpindyewu, maalaba diloolo, masangisha neabange pa dîbà mwandamutekete ne tusunsa makumi asatu, dîbà dya ciibidilu, maalaba diloolo, ne diloolo dyônsò lumingu elu. Nulwayi nulwe kuteeleja Mwaneetu Neville ne bakwabo bambi aba, ne twêtù bônsò, bônsò pamwe, bàdì bàteetà bwa kujuula ditabuluja abu. Nzambi anubeneshe. Kî ntwêtù bàdì mwa kudijuula to. Bikengela bwa nwênù—bikengela bwa nwênù kudijuula pamwe ne twêtù, mu kusambila, biikàle nulwa, nuleeja diikalanganaku dyenu kaaba aka. Nzambi ikalè neenu.

¹⁸⁹ Mpindyewu, ndi njinga bwa nwênù, pàdì anu ne disangisha dyatangalaki, ne lukasa lwônsò, bwa . . . nupatuke mu citanda. Tudi ne tusunsa tutwe ku makumi asatu twa didiibidija dya kutwa kwa lwendu lwa babàka mwab'ewu diikalà mwa kwenzeka. Ne bamwe baa ku bantu balume batu baya ku midimu. Nenku netwikalè mwa kwinyika mitu yetu.

¹⁹⁰ Nenku ngeela meeji ne ngũmvù Mwaneetu Junie Jackson lwà mundekeelu mwa bateeleji mwamwa. Mwaneetu Junior, udi mwab'ewu diloolo edi anyi? Mwaneetu wa mu New Albany, ekeleeziya wa ba-Méthodistes. Eyo. Wêwè Mwaneetu Jackson udiku mwa kututangalaja ne mwaku wa disambila anyi?

[Mwaneetu Jackson udi usambila. Katupa kaa mukaba wa mêyi munda mutupu—Muf.] . . . ? . . . ne cya kubwela mu dibaka, pitaayi kumpala eku ne lukasa lwônsò mpindyewu.

¹⁹¹ Mukalenge anubeneshe. Netumonangane neenu diloolo dya maalaba.

Mwânà wa kanyinganyinga ne dikenga;
Nedikupe disanka ne dikukankamika.



BIMFWANYI BYÀ KILISTÒ LUA59-0525

(Images Of Christ)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dimwe diloolo, mu matuku 25 a ngondo mwitànù, cidimu cya 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org